

光緒江西通志

江西通志卷一百二十九

宦績錄五 瑞州府

南唐 增

陳承昭昇元中令高安有治才築羅城濬溝洫百廢具

舉甚有政聲 明一統志

王紹顏以討東甌功擢高安令後加游奕使伐馬楚復

立大功保大十年授金紫光祿大夫筠州刺史時狼寇

入境紹顏率義兵八十餘人立寨備禦民賴以安 明一統志

舊志原系南唐書保大十年春分洪州高安縣置筠州以王紹顏爲刺史明一統志林志俱作王顏者訛

宋

甯麟慶厯間知新昌縣愛民禮士首建學宮旣沒民立

祠祀之 嘉靖林志

周堯卿字子俞道州永明人天聖二年進士知高安縣
提點刑獄楊紘入境有被刑而耘苗者紘就詢其故對
曰貧以利故爲人直其枉令不我欺而我欺之我又何
怨紘至縣以所聞薦之後通判饒州積官至太常博士
堯卿爲人簡重不校有慢己者必厚爲禮以愧之居官
祿雖薄必以周宗族朋友罄而後已

宋史儒林傳

蘇轍字子由眉山人與兄軾同登進士科元豐初以忤
王安石謫監筠州鹽酒稅元祐初除右司諫爲時人所
忌再謫知袁州未至降少府監分司南京筠州居住時
大疫鄉俗禁往來動靜惟巫祝是卜轍多製聖散子及
煮糜粥徧詣病家與之所活甚眾徽宗朝復大中大夫
致仕築室於許號潁濱遺老政和二年卒追復端明殿

學士謚文定

宋史

謹案轍在筠州雖罷職閒住而有惠及民故仍依舊志與宦是邦者並列

李懷道元豐中知上高縣始至卽建學以教士不踰年執經至者數十百人爲政不苛而民肅徭賦訟獄之事不諉於府蘇轍以爲有古之道其所以得民者非復世俗之吏云

明一統志

柳平字子儀武陵人元祐中知筠州事江西惟筠州不歸於訟子儀至政益清簡訟愈以無乃新燕居之堂榜曰江西道院以鼓舞其俗百姓悅焉

嘉靖林志

邵叶晉陵人元祐閒宰新昌縣視事三月有異政芝生

室中黃庭堅爲之記

瑞州府志

張堯佐永安人爲筠州推官吉州有道士與商人夜飲商人暴死道士懼而遁邇者執之捕繫百餘人轉運使

命堯佐覆治盡得其冤

據一統志補

范潔字景圭劔浦人南渡初知新昌縣披榛櫟撫瘡痍

以創縣治邑人賴焉累遷知鄂州

嘉靖林志

程全北海人建炎閒筠州都監金人寇江西守臣遁全攝州事有盜祝生者來攻全拒之且戰且前至萬載兵少力罷而敗盜執之刳其腹以去

一統志

姚鉉字夢元濰州北海人紹興初以新昌丞攝縣事有政聲得薦於朝就除知本縣鉉文詞敏麗嘗輯唐人文

百卷目曰文粹天禧四年卒

宋史新昌縣志

譚申長沙人政和進士紹興四年知筠州旱禱於郊頃之大雨歲饑民不能輸請罷徵監司督益急坐罪降秩致仕歸民感其仁立祠祀之號曰古譚

豫章書

羅薦可字養蒙沙縣人紹興二十一年知筠州事政務修舉民輸納者令其自行概又嘗遷州學於鳳山宅高明以遠器俗後調守常州

嘉靖府志

黃輔之乾道間知上高縣值亢旱巡閱民田災甚者悉蠲其賦邑士有言吾團獨不旱不當蠲輔之曰縣令字人之官不早猶應言旱況眞旱乎遂以一邑俱旱聞州郡大怒欲易之輔之抗章自劾朝廷從其請邑人德焉

嘉靖府志

倪思字正父湖州歸安人乾道二年進士淳熙四年爲

筠州判官剛直不阿吏民懾服仕至寶文閣學士卒諡

文節

舊志謹案宋史本傳不言爲筠州判官當屬史氏闕略

徐應龍字允叔建甯人淳熙二年第進士知高安縣事

正經界清訟獄不縱不苟嘗經紀呂祖儉之喪有勸以勿迂時宰者應龍曰呂君吾所敬雖緣此獲譴亦所願也朱子貽書稱其義風凜然

宋史本傳一統志瑞州府志

芮及言字子及雪川人嘉泰三年知上高縣政事精勤容貌嚴厲一縣畏憚之號爲小監司嘗書所坐屏後云少飲酒加餐飯勤出廳公事辦莅官四年終始如一

嘉林志

趙伉夫字尊道雪川人開禧間知上高縣內服而外舉政尙慈恕不爲橫斂民愛之目爲趙佛子

嘉靖林志

黃伯固字子堅將樂人嘉定二年知上高縣吏事精明剖決不倦大要以抑強扶弱爲本姦豪爲之屏迹復稽考版籍詭寄隱匿諸積弊搜抉無遺任滿餘錢三千緡

悉留縣庫而去

豫章書

張次賢字子齊僊居人嘉定四年知上高縣始營卒不屬邑轄往往橫恣爲民害次賢政成入朝首言及之反以論去未幾入爲正言乃貽書新尹趙汝笈請於胡乞重彈壓之權而已從中主其事由是縣令遂兼轄兵馬邑人德之

豫州府志
上高縣志

夏祐温州永嘉人嘉定八年以進士尉上高廉介自持縣有所委事一斷以公未嘗以書通顯要嘗謂人曰窮達有命吾豈可枉道求伸邪

嘉靖
林志

趙汝笈字景師四明人慶元二年進士嘉定十一年知上高縣政尙清嚴待士以謙斷獄以恕治狀爲諸邑最先是諸鄉額有坊場許人買換名曰教練每名認白納

錢少者歲不下百千民被其擾汝笈力申朝省遂罷之

明

一統志
鄧縣志

唐璘字伯玉古田人嘉定十年舉進士調瑞州學教授
崇禮讓後文藝士翕然知嚮累官江東運判時邊事急
置四察訪使就詔璘分建康太平池州江西璘揭榜馬
前咨所部以利害且奏捐總領所錢二十萬緡助江防

軍聲大振

宋史

趙綸字子微寶慶間知新昌縣興利除害勵精爲政嘗
編刻圖志修縣學置貢士莊建都倉四門館驛及安濟

院皆有成績可觀

嘉靖
瑞州府志

林觀過字退齋端平間知新昌縣性敏捷有文名嘗聘

饒魯至縣講學士習爲之一變

嘉靖
瑞州府志

江湘新昌人嘉熙閒知上高縣博學能文練達治體始至卽請於安撫吳淵蠲積逋六萬餘緡民困以蘇庚子春大水發倉平價以糶又贍學有田無告有養新浮梁築陂堰因所利而利民者不可勝紀

嘉靖林志
瑞州府志

陳登字敬齋三山人瀋祐閒知新昌縣以寬靜爲治踰年政平訟理民懷其惠爲之立祠

明一統志

曾埧紹興人開慶元年爲瑞州錄事參軍以州命行縣振恤饑民值元兵至見執帥聞其名誘以利不從且罵之遂死事聞贈秩官其一子

嘉靖林志

陳僭景定閒知瑞州事增置學田建浮橋新利貺廟又興修東樓及諸倉庫職事修舉士民稱之後升太府丞

嘉靖林志

應俊字東野天台人景定閒知新昌縣弭盜安民政教
修舉嘗奏請罷徵縣稅著有琴堂諭俗編行於世嘉靖
林志
謹案謝志有李公彥崔鵬方逢辰三傳鵬逢辰無江西
宦績公彥已見撫州府列傳此爲複出今刪

元

盧源字子玉至元閒爲瑞州路總管政尙廉靜終始如
一新昌劉奏差之亂源戮其渠脅從者悉宥之嘗夜憩
亭上鄰翁以杖擊物誤中源翁旦往謝罪源曰勿謝汝
誤中他人耳其度量如此嘉靖
林志

實都沙

原作忻
都沙

元貞二年爲瑞州路達哈喇齊

原作達
魯花赤

會徵夏稅僚屬耆老僉言諸路田一畝徵糧四升惟本
路獨用宋制徵倍他郡官降斛斗又大他郡三之一若
以所餘折作夏稅民受庇多矣實都沙上其議遂得免

徵

瑞州府志

房弼字仲明大德閒知新昌州事崇尚教化嘗設社學以課民子弟遷建惠民藥局尤善書州之坊額皆其所

題焉

瑞州府志

張珪涿州范陽人

府志作歸德人

懋孫至順閒爲高安縣尹莅

政清明斷獄無滯勸農桑平賦役歲饑諭富室貸鈔糴糧五萬石以振邑人立祠祀之擢江西檢校拜南臺御史繼爲淮西江西二道廉訪僉事

元史張懋傳瑞州府志

劉基字伯溫青田人幼穎異至順閒舉進士除高安丞

發奸摘伏不避強禦爲政嚴而有惠百姓安之以行省

辟謝去

瑞州府志

詳案基後仕明爲開國功臣明史有傳

約蘇卜

原作禹蘇福

至正十一年爲瑞州路總管紅巾寇起

約蘇卜督兵討之斬獲萬餘其後復屢敗賊繕治城池

民胥賴焉

嘉靖林志

和尼齊

原作火逆赤

蒙古人至正十三年以福建左丞統師

討賊時瑞州方爲賊據和尼齊進攻克之誅徐壽輝將

況普天等未幾普天黨李五率賊來犯圍城三閱月和

尼齊集義兵及苗軍以拒斬獲萬餘李五潰遁乘勝討

華林黃嶺諸賊以漸平服民恃以安

安志

劉朝宗至正十八年知高安縣時兵事擾攘日不暇給

朝宗辟選吏胥設社長及坊正爲禦敵計一日劇賊張

赤腳謀三鼓攻城朝宗諜知之嚴兵以俟賊知有備僅

掠牛畜而去

嘉靖林志

謹案舊志有余岳傳岳上饒人今改入廣信府列傳

李懋蒲圻人洪武初知新昌州事既創州治爰及譙樓學校聿新津梁毋廢乃條八事以諭俗曰敬父母厚人倫訓子弟務農桑崇學術息訟爭禁賭博慎廉恥言皆切實可行

嘉靖林志

黃權字公衡浙江天台人洪武閒知上高縣始至值亢旱有言裏陂溉田甚溥而艱於工作者權力修復之歲連穫民咸資其利卒官所著有冰壺集

嘉靖林志謹案舊志作黃拳

與字公衡之義不合改從瑞州府志

魏希哲字原明浙江蕭山人洪武二十七年以薦知上高縣年已七十矣至官以廉明著盜賊屏迹豪強畏威其精神無異少壯也

明一統志

沈秩洪武中

建文一作文

知高安縣事志履修潔持清慎以臨

其民撫循有方獄訟無滯民皆愛慕之

明一統志

張賢福建漳州人永樂閒任新昌知縣性剛毅不避權

勢郡守某不法賢特疏劾罷之僚佐有才者悉薦舉正

氣凜然遠邇咸服

瑞州府志

陳璣福建福清人由吏員授進賢縣倉大使正統元年

以侍郎趙新薦擢知高安縣事璣負長才遇事當機立

應先是邑民有負遠不附者璣至示以恩信招徠之弗

率者繩之以法境內翕然

嘉靖林志

周觀德廣東東莞人正統閒爲上高縣丞值亢旱積誠

禱神烈日中步行四十里歸途大雨如注從者進盞觀

德卻之曰赤地垂枯今旣雨快甚焉用盞爲比至縣平

地水深尺餘歲賴有穫

舊志瑞州府志

瑞

晏鐸字振之四川富順人永樂十六年進士由御史坐事謫上高典史鄰境寇發官兵不能討鐸捕滅之歸所

掠於民

據明史文苑劉溥傳補

劉羽山東德州人舉人成化七年任瑞州府同知首建文廟斂不及民性廉靜常俸外無所取終歲食蔬人稱

爲青菜劉云

嘉靖林志

顧純字以正南直隸華亭人成化八年進士十年任高

安知縣政務恤民不事苛刻歲大旱民不聊生純力請

蠲租勸富民振貸民賴以活者甚眾

嘉靖林志

諸觀字民瞻浙江餘姚人成化二年進士十六年以工部員外郎出知瑞州府崇廉斥貪甚著威惠嘗自誓曰

貪墨之吏猶不貞之女一有點污何以見人時有訟者暮夜餽觀金不受卒寘之法其清正如此後調知南安

府

瑞州府志

張囂字元器浙江歸安人成化十四年進士二十二年知上高縣事興學弭盜均賦節浮新昌降賊譚尙武者假巡捕之名擾害鄉里囂密疏除之地方以謐累升福

建副使

舊志

陳鉞字廷威福建莆田人成化閒以麻城教諭升瑞州府學教授師範端嚴動靜不苟每講論雖盛暑必正衣冠尤長於文辭著有古屋詩集

嘉靖林志

龔伯甯字文卿湖廣崇陽人成化二十年進士知新昌縣事植弱鋤强釐弊摘伏人服其明正疆界興水利人

被其澤以述職卒於京

嘉靖
林志

王本義字汝宜湖廣松滋人宏治間中鄉試第一授江陰訓導擢知高安縣事性勤敏每治公事令兩吏讀民詞且治且聽竟無違錯操履堅白在官八年如一日致仕後復以事至高安民爭挈壺漿送之有至九江始返

者

嘉靖
林志

張錦四川岳池人宏治十一年爲瑞州府捕盜通判有謀勇遇賊發輒能先知嘗獲賊繫至湖城賊黨追急乃身先禦之賊佯退設伏以俟錦給賊就食閒道急趨賊不能害

安志 謹案瑞州府新志刪去給賊就食二語遂若錦設伏以誘賊者謬誤甚矣附辨正之

劉璣字用齊陝西咸甯人成化十七年進士宏治十二年以戶部郎出知瑞州府性甘窮約家食常不給衣則

自公服外無餘然頗尙德化新昌盜起璣率兵抵其巢
諭以禍福賊皆感泣散去論者謂有古循良之風

安志瑞

州府志

童旭字賓陽湖廣沔陽人宏治十二年進士十四年任
上高知縣廉明有威不徇權勢境內淫祠旭毀除之殆

盡累升知府

瑞州府志

張翀字鵬舉南直隸泰興人宏治十八年進士正德三
年任上高知縣時劉瑾暴橫所在輒籍民產翀力遏之
弗避禍害夙留意武事華林盜掠郡縣殆徧獨不敢犯
翀境尋召爲監察御史

安志

姜榮字仁甫浙江餘姚人宏治十五年進士正德五年
以工部主事左遷瑞州府通判尋署府事華林賊猝至

榮以印屬妾竇急出募兵竇埋印於池城破被執時有盛老者亦被賊虜竇給賊釋之令報官索金帛贖已而密屬白印於官盛老去竇投井死榮因此果得印募兵四至賊亦稍卻會知府鄺璠至榮與戮力勦賊已而繕城濬池屹成保障郡人賴之

瑞州府志

鄺璠字廷瑞直隸任邱人宏治六年進士正德六年知瑞州府甫莅任華林盜猝至璠素諳兵略率民兵登譙樓手發毒矢射卻之賊退築城堡謹坊巷調兵旅踰年而賊始滅民得案堵皆璠力也尋以忤時貴罷官

瑞州府志

袁瑤字廷璧山東成山衛人有膽氣精騎射正德六年任高安主簿當道委以捕賊不避艱險十年建昌賊首徐九齡等聚眾醴源洞勢甚熾瑤承檄統兵分勦與賊

對敵死於陣事聞贈知縣從祀節愍祠

嘉靖林志

王以旂字士招應天江甯人正德六年進士除上高知

縣華林賊方熾以旂訓鄉兵禦之賊不敢犯累官兵部

尚書三邊總督卒贈少保諡襄敏

明史謝志原案瑞州府志以旂慈祥愷

悌禮士愛民時甯邸恆苛派剝民以旂獨不為顧使歲省錢數千緡修城池建社學為召之日士庶遮留舟不

得進者數日

宋以方字義卿湖廣靖州人

進士題名碑作長州府黔陽人

宏治十八

年進士歷戶部郎中正德十年遷瑞州知府時華林大

盜甫平瘡痍未復以方悉心撫字吏民愛之宸濠逆謀

既萌瑞故無城郭以方築城繕守具募兵三千日夕訓

練宸濠深忌之有徵索又不應遂迫鎮守劾繫南昌獄

明日宸濠反出以方脅之降不可械舟中至安慶兵敗

問地何名舟子云黃石磯江西人音則王失機也宸濠以爲不祥斬以方祭江後賊平其子崇學求遺骸不得乃斂衣冠歸葬嘉靖六年巡撫陳洪謨上其事詔贈光

祿卿廕一子立祠瑞州

明史忠義傳

胡堯元字廷獻湖廣蒲圻人正德六年進士任戶部主事以抗直謫高郵州判尋遷瑞州府通判宸濠反堯元方兌運吳城鎮聞之戴笠步歸遂練兵爲討賊計未幾逆黨李儀賓自上高轉掠至郡堯元率敢死士擒之宸濠氣阻瑞州城克全以功擢本府知府尋遷廣西左參政瀕行老少泣留者數萬人

安志 舊志原案王守仁辭爵疏略云宸濠變初起

勢焰昌熾人心疑懼當時首從義師自伍文定邢珣諸人外又有知府陳槐胡堯元曾璵等知縣劉源清馬津傳南喬李美李楫楊材王冕顧似劉守緒王軾等或推鋒陷陣或邀伏擊贊畫謀議監錄經紀所謂同功一

體者也今臣獨崇罰而此同事諸人或不行其賞并削其績或賞未及播罰已先行或虛受升職之名因使退閒或冒蒙不忠之號隨以廢斥羣

憎眾嫉臣竊痛心奏入寢不行

端廷赦字世恩南直隸當塗人正德十六年進士嘉靖元年知高安務以德化民立聽息碑遇詞訟願休者聽無纖毫科罰徵稅寬立三限不假筆楚民自樂輸尋內

遷御史

瑞州府志

陸時雍字幼醇浙江歸安人嘉靖二年進士授上高知縣資性明決勤於吏事嘗建漕儲倉以便民纂水利志以便一方農事累遷江西提學副使

瑞州府志

董紹字宗達南直隸武進人嘉靖二年進士四年任新昌知縣性清介所需悉取辦於家既而入覲家人誤攜一銅缶紹知之趣馳三百餘里納諸縣

江南通志

竇茂字文盛直隸永平人嘉靖中任上高縣丞平恕勇斷時邑有少年無賴者四人肆行剽掠民苦焉茂捕得置之法一邑稱快

安志

許仁卿字天爵浙江臨海人中應天鄉試第一嘉靖二十年任瑞州知府會大饑穀價騰踊仁卿多方救濟全活甚眾又倡建仁濟橋親詣鄉都勸助踰年告成功存

永世

安志瑞州府志

毛愷字達和浙江江山人嘉靖十四年進士由工部郎中出知瑞州府涵養深粹喜怒不形時漕糧缺督兌官愷立限親徵不逾月而集撫按刻其名以勵各郡事母至孝貧約自甘時有孝過黔婁廉方伯起之譽

安志瑞州府志

潘仲驂字時乘浙江烏程人嘉靖二十年進士由編修左遷瑞州府推官資性敏捷剖決如神在任多懲豪惡良民稱快尤優禮學生修改廣福寺爲尊道書院堂亭號舍規制煥然又置學田以贈多士咸感戴焉升太平府同知累官廣東僉事

安志瑞州府志

張志淑字世彥浙江臨海人舉人嘉靖中授瑞州推官發奸摘伏如神險健者相戒勿犯直指行部必檄志淑與俱慨然以激揚自任墨吏聞之悉望風解綬以去遷

廣西思恩知府

浙江通志

鄧之屏四川巴縣人嘉靖三十八年進士隆慶閒知瑞州府事甫下車聚四學之俊於筠陽書院試之躬親評閱月給以膏楮是科登鄉試者九人歲大旱徒步禱於

神雨立降明年復荒勸富室平糴施糜粥以振民獲更生又立倉以垂永利高安賦額偏重則詳請減之民苦徭役請行一條鞭法升蘇松兵備筠人思之不能忘

瑞州府志

程大廉南直隸長洲人舉人隆慶閒知上高縣縣舊無城大廉謀諸通邑區畫百方民無勞累而四封屹然至今有倚城如倚程公之謠

瑞州府志

邱鍾福建龍巖人舉人萬厯十三年任瑞州府同知愛民懲奸不避強禦巡按某有獄屬鍾譏鍾廉其冤擬末減曰吾豈殺人媚人者三駁仍不可奪巡按乃批其牘曰縱宦情淡薄不應如是執也鍾卽岸然致仕去人稱古之遺直

安志

卷一

王照浙江山陰人萬厯舉人知新昌縣事勤政愛民時方丈量田畝照布衣草履躬行田閒鑒高安浮糧之累

甯隘其額民陰受賜焉

瑞州府志

岳方四川南充人舉人萬厯中知高安縣清德藹然務與民休息訟者溫詞勸釋多感化而退升任去民肖像

祀之

安志

周之基字季子湖廣湘潭人萬厯十一年進士由戶部郎出知瑞州府首問民疾苦知高安受倍賦之累前守王以通特疏具奏未有成議之基謂不如父老自陳乞庶可邀恩卽草疏令民王乾等詣闕請命後竟以催科從寬爲忌者借言及之之基拂袖去郡人追懷其德立

去思碑

舊志 瑞州府志

戴尙志浙江蕭山人萬厯中以刑部郎出知瑞州府實
政愛民勾攝之擾留滯之獄皆無之高安苦兌運至有
賣產鬻妻子者尙志與知縣田一甲議改爲官兌令糧
簿先期排船民運至舟官押赴省闕邑免無窮之累至
今誦之升雲南副使一甲四川忠州人萬厯二十九年
進士知高安縣後擢河南道監察御史

瑞州府志
四川通志

趙捷字習南雲南鶴慶人舉人官瑞州府同知攝高安
令有大獄株連甚眾捷坐殺人者數人餘俱杖釋且力
爭於上曰吾不忍殺人以媚人也上官銜之遂致仕

雲南通志

湯有光字孟弢應天上元人舉人知瑞州府事政不苛
擾嘗夢郡有火災竭誠齋禱明日闔郡見火星南飛災

竟免

江南通志

林之蘭湖廣安化人萬厯中由國子生任瑞州府通判存心愛民威惠兼濟嘗捐俸積穀三千七百石以備荒米價騰涌復置義倉平準之郡前浮橋商稅舊苦搜索之蘭力申革之四民皆頌德

安志瑞州府志

陳江福建長樂人例貢生萬厯閒任高安縣丞以劉誠意曾爲此官作景劉堂以見志冰清之操六載如一上官屢旌其廉已而署縣事值歲大饑捐俸以飯饑者斂死者能聲益著擢興州同知

安志

楊大名字君實湖廣江夏人舉人崇禎二年由知縣升瑞州府同知有幹才時以贛州九蓮洞之變檄各郡縣修城大名董其事南瑞兵備缺官以大名權之多所區

畫凡爲同知十三年三署兵道四署邑再署府皆以廉

能稱

白志瑞州府志

謹案舊志有袁斌傳考明季北略斌俗南昌府推官胡時杼勦靖安奉新等縣踞賊則非瑞州之事今改列南昌府

國朝

孟命世字淑子江南懷甯人諸生順治戊子金聲桓之叛命世隨大兵入江西委知瑞州府厯一年題敘寶

授時兵燹後繼以太饑田疇榛莽命世單騎履畝開除

荒糧數萬石民甚德之

瑞州府志

張仁聲字四服直隸武強人由恩貢生授蘭陽知縣升瑞州府同知時高安劇盜猖獗仁聲密偵得其情夜集營兵出不意直搗賊巢擒其魁殲其餘黨四境以安

高安

縣志

易道沛字晴湄湖北漢陽人順治六年進士知上高縣能興利除害歲饑捐俸買穀以振申請蠲浮糧萬九千餘石減乏丁萬四千有奇士民懷之

一統志上高縣志

黃運啟山東昌邑人順治十五年進士康熙元年知新昌縣多善政甲寅山寇竊發運啟集義勇爲勦守計乘閒以兵入其巢渠魁殲焉邑賦浮於田力請題免浮糧若干石民立祠祀之

一統志謝志

莫之翰湖北潛江人康熙九年進士十七年知上高縣事時浮糧既汰里甲未併役重差繁民猶以爲累之翰力請於上官得併里革費民享其利甚溥

瑞州府志

趙世錫字永公遼陽人由部曹出知瑞州府甫下車勸

學課士藹然以師生禮相接又念瑞州物產無幾教以蘇杭養蠶法刊書繪圖以告且自湖南購採桑苗至分給之不數年產絲甚多合郡皆感戴

瑞州府志

盛鍾賢字右子一字岫庵浙江於潛人康熙十八年進士任高安知縣以德化人作興士類催科不事鞭扑聽訟不尙刑威邑賦不逋庭牘無枉在任七年卒於官

高安

縣志

林運鑑字千史廣東文昌人康熙舉人任高安知縣躬親勸稼建文昌閣集諸生誦讀置田廩之分校鄉闈所取皆知名士禁溺女置義冢折獄嚴愼在任七載報最

以母老陳情不獲卒於任

廣東通志

王樸字文重一字震來貴州黃平人康熙三十六年進

士四十七年知上高縣事邑有襄陂積久頽圯屢議復未果檉至首以爲務經營圖度越月而成灌田四十餘

頃至今賴之

瑞州府志

錢志遙字孺堂江蘇甘泉人

進士題名碑作丹徒人

雍正八年進

士十二年署新昌縣事民有構訟者平心鞠之不輕設桁楊曰所以勵廉恥也乾隆六年調南昌奉檄築螺絲港埧鳩工運土晝夜籌度延袤數里事辦而不以擾民

瑞州府志
南昌府志

凌西峯字申亭河南西華人舉人乾隆三十九年知上高縣事廉介嚴明服食若寒素有所詣勘肩輿從數人以行不以官擾民也事必躬親立判曲直胥吏無所容奸有疑獄虛衷鞠之得實乃已尤愛士公餘延見勛以

讀書敦品在任數載士民向風職務具舉羣號淩青天

云

瑞州府志
上高縣志

陳雲章福建莆田人嘉慶十四年進士二十四年知新

昌縣事莅政嚴肅神於燭奸邑素有惡民爲害鄉里廉

得之翦除殆盡民歡然頌思

瑞州府志

張大觀字愚谷安徽銅陵人道光二十五年進士二十

七年任新昌知縣莅事精敏判獄如神治蠹胥不少假

貸愛士育才每以經史詞章爲勛成就甚眾

瑞州府志

劉騰鴻字峙衡湖南湘鄉人初隸甯紹台道羅澤南麾

下從攻武昌積功至知縣咸豐六年湖北巡撫胡林翼

檄騰鴻偕同知曾國華參將普承堯等援江西進規瑞

州戰屢捷援賊石達開眾號三十萬與城賊犄角騰鴻

力戰大破之七年遂議濬長濠斷賊餉道且遏臨江之援七月十一日克橋南賊壘翼日再進身被五槍不退攻益急又明日裹瘡再進巨礮洞左脅卒將絕猶顧弟騰鶴大呼殺賊賊遂以是夜遁亟追之斬獲略盡城遂復事

聞贈道銜同治三年諭克瑞州功追諡武烈騰鴻治軍嚴屯瑞

經年未嘗取民閒一物其歿也民哀思之作紀恩錄自

專祠之外私禱祀者無慮數十處云

江西忠義錄瑞州府志

龔翔雲字翥南貴州貴筑人由拔貢生官刑部郎治獄仁恕出知南康府咸豐九年調知瑞州先是有游勇四人殺於鄉民湯姓山中湯報縣縣卽逮湯嚴訊誣服案已定翔雲至稔其冤請於上官湯遂獲釋闔邑頌其神

明尋以病卒

瑞州府志

趙樸庭字詠荃江蘇陽湖人咸豐九年知新昌縣事十一年夏粵匪薄城城陷與兄樾庭訣大書患難兄弟辛苦流離成仁取義皓首同歸十六字於壁緘印置案上罵賊遇害奉

旨褒卹入祀昭忠祠

瑞州府志

宦績錄六

袁州府

齊

嚴植之字孝源建平秭歸人建武中爲康樂侯相在縣

清白民吏稱之

據袁州府志補

隋

劉曠爲萍鄉令長七年獄無繫囚爭訟絕息高頴重其

治績薦以爲莒州刺史

據袁州府志補

唐 吳南唐埒

唐萼武德閒令萍鄉始建學於縣南寶積寺左至今祀

之

嘉靖林志 謹案萍鄉原誤宜春袁州府志辨之今據改

房琯字次律河南人天寶閒爲宜春太守立學宮創州

治縣懷其化州濡其澤累遷憲部侍郎同中書門下平

章事

舊志 李退叔文集

闕瑜廣德閒袁州刺史值兵革之後招集流亡專務德

化州境大治及改撫州百姓蟻附相從吏不能止後拜

戶部侍郎

明一統志

蕭定字梅臣江南蘭陵人爲元載所擠由左右司郎中
出爲袁州刺史改信州所莅有政聲大厯中有司條天

下牧守課績惟定與常州刺史蕭復濠州刺史張鎰爲
理行第一其勦農桑均賦稅逋亡歸復戶口增加定又
冠焉尋遷戶部侍郎除太子少師卒

舊唐書
良吏傳

柳渾字夷曠一字惟深本名載襄州人天寶初舉進士
至德中爲江西採訪使皇甫侁判官尋除殿中侍御史
知江西租庸院事大厯初江西魏少游又表爲判官州
僧有夜飲火其廬者歸罪瘖奴軍候受財不詰獄具渾
與其僚崔祐甫白奴冤少游趣訊僧僧首服因厚謝二
人路嗣恭代少游渾遷團練副使俄爲袁州刺史酌古
良牧之政宜於時者宣行之

新舊唐書
袁州府志

崔倕清河武城人建中初詔求可爲良二千石者倕得
權袁州至官朞月以成績聞遂眞拜刺史

舊唐書崔邠
傳明一統

志

李將順元和四年自員外郎出知袁州時州多火災將順一日與僚屬出西郭門見南山水可堰乃命築防疏溝引水入城使可通舟楫郡人利之名曰李渠又於城外西北築益州塘功施後世民立祠以祀

明一統志

韓愈字退之鄧州南陽人擢進士第元和十四年以言佛骨貶潮州刺史移刺袁州州人以男女爲隸過期不贖則沒入之愈至悉計傭得贖所沒歸之父母七百餘人因與約禁其爲隸歲太旱爲文禱城隍及仰山神甘澤立應穆宗卽位召拜朝散大夫奏乞以在袁日放免傭隸之政推之天下著爲令

唐書及舊通志

韋建太和五年知袁州在任闢羅城二百餘閒濬濠二

百丈清靜爲政無所侵撓郡中大治

安志謝志原案南唐有韋建此又

人

李游字觀業中和閒任袁州刺史時黃巢寇掠江右游設法防禦并率郡民團練賊聞風颺去郡賴以全沒後士人感其惠立廟宜春臺下歲時享祀

據袁州府志補

揭鎮乾甯二年守袁州興利除害惠鮮疲氓勸農桑阜財用築城濬池諸役斂弗及於民

嘉靖林志

杜琯天復元年以司空爲袁州刺史時方擾攘琯阜財

恤民捐私帑代民輸賦民皆感之

嘉靖林志

王安廬江人又名會吳順義二年累遷至袁州軍州副使除知軍州事以沈默寬緩爲治州人悅之公旬趨事

恆忘厥勞南唐受禪遷虔州節度使

據袁州府志補

韋建少居吳太祖軍中以膂力聞累遷諸軍都虞候左衛使出爲袁州刺史建不知書而性渾厚清靜自處無所侵撓郡中大治數年入爲統軍百姓思之

南唐書

張承傑初監臨袁州創闢州治昇元四年詔權袁州軍奏移州廨復故趾重立甲仗樓庫是年召歸保大八年再除知袁州以慈仁爲治訪求民瘼課績稱最

安志

邊鎬昇州人以定楚功除袁州刺史增修城堞州北廣濟橋唐中和閒權刺史鄧璠所建毀於水鎬聯舟十二

爲梁名曰永濟宜春有浮橋自此始

嘉靖林志謝志原案陸游南唐書

稱鎬保大初年拜信州刺史八年馬希萼入潭州命鎬以州兵如界上覘楚九年鎬出宜春討長沙破其軍云是由信州刺史立功後改袁州未可知或據南唐書以林志爲誤非也

劉仁瞻字守惠彭城人事烈祖爲左監門衛將軍自黃

州遷袁州刺史精吏事規畫有方一新州治後守壽州

盡節

南唐書

史公銖保大中自池州團練使除袁州刺史練習政事

吏不能欺文武兼資民慶安堵

嘉靖志

呂延眞以司徒自吉州兵馬都監移知袁州臨事敬慎

修城濬濠有不便於民者革不踰時在郡歲屢豐五年

告歸

據袁州府志補

宋

程元白中山博野人太平興國初明經中第爲宜春令

居官有惠政不求名譽後以子琳貴累贈太師中書令

嘉靖志

王懿字文德大名莘人至道閒知袁州時州多火災懿

疏唐李渠以備之民歌曰李渠塞王君開四民惠利絕

火災

明一統志

張希顏景德間知萍鄉縣時張詠問殿直范延貴曾見好官否延貴乃稱希顏詠問何以知之答曰昨過其境驛傳橋道皆修葺野無惰農肆無博市易無喧夜更鼓不絕以是知其爲好官詠乃薦於朝

明一統志

張錫字貺之漢陽人大中祥符元年甲科試祕書省校書郎知南昌縣遷萍鄉令爲人厚重簡約雖貴奉養如少賤時讀書老而彌篤累官侍讀學士右諫議大夫贈

工部侍郎

宋史

袁延慶天禧初通判袁州有能名刺史李龜從異待之州務多委決乃復舊渠以備火災立疏泉亭刻石記其

事

嘉靖林志 謹案袁延慶袁州府志作袁延度

王揆以著作佐郎知分宜縣景祐丙子夏大雨水公私廬舍墊溺揆修葺廨舍建大門長樓皆節費爲之不斂

於民民懷其德

嘉靖林志

祖無擇字擇之上蔡人進士高第歷知南康軍海州提點淮南廣東刑獄廣南轉運使入直集賢院出知袁州自慶歷詔天下立學十年閒其弊徒文具無命教之實

無擇首建學宮置生徒郡國弦誦之風由此始盛

宋史

李禹卿字君益至和三年由蘇州通判移袁州會知州

翁及死哀其貧適吳人歸職田錢二十萬立分其半遺

及家僚屬亦合錢二十萬以賻遷知澤隨二州旣去民

懷其恩官至司農少卿

嘉靖林志 謹案舊志移袁州句移下衍知字今刪

張補之治平閒知宜春縣政尙仁愛民懷其德邑人朱

景陽作詩榜於道頌之 明一統志

唐謨熙甯閒以寺丞出知萍鄉縣下車修鄉校親執經

就儒士講說未幾學池中忽生瑞蓮是歲郡貢士四人

縣居其三 萍鄉縣志 謝志原案科目志熙甯二年己酉鄉試蘇方叔彭襄高無黨皆萍鄉人

徐思閔字聖徒蘇州人熙甯閒以司農少卿出知袁州

時江西劇賊詹遇所過屠劫袁獨有備不敢犯鬯芳旁

布致瑞粟嘉禾之異百姓歌之轉運蔣之奇薦於朝官

至中散大夫 豫章書

廖子孟字獻卿元豐三年以屯田郎中知袁州時太平

日久慮民狃於安樂乃卽黃圃創巡檢司養兵以禦盜

仍奏置巡檢一員 安志

鄭民瞻字叔巖紹聖初知袁州發姦摘伏如神會頻歲
災侵民瞻量戶口多寡及富民穀數劑其平給告糴者
張圖座隅遣人按行察視民賴無流亡之患

明一統志

鄭强崇甯進士宣和五年由國子博士知萍鄉相傳縣
民多瞽强相縣治形勢鑿二池於縣前居人遂無恙又

建館步橋築蘆溪陂溉田人號鄭公陂

萍鄉縣志

孫琪宣和六年通判袁州時民三罹火災琪見袁延慶
疏泉亭記欲濬舊渠爲火備以告太守守懼勞民琪曰
天下事不少勞何以久逸不暫擾何以長治今民困於
火可坐視而不知備邪守服其言遂治西陂濬舊渠如

故琪自爲記

袁州府志

阮閱字閔休舒城人建炎元年知袁州初至訟牒煩瀆

閱大書依本分三字榜諸四城郡民化之漸以無訟乃

取以名其堂

袁州府志

汪希旦字周佐建炎初知袁州築城濬濠修治戰具及

建內城西門民賴以無患

袁州府志

徐昇紹興三年知萬載縣先是金人陷豫章邑數被兵
叛將杜產等乘虛犯境焚劫四起民無以爲生昇至乞
師討平諸叛乃招流離建縣署一時獲安堵焉

萬載縣志

志

陳煥字元光紹興中知袁州慕韓愈爲人初廳事西有
堂名燕衍一日顧左右曰二千石當勤治理詎可以飲
食爲樂乎乃更以景韓名之從校官劉瑜請修州學士

服其教

袁州府志

沈昭遠字傳曜紹興中由戶部侍郎出知袁州袁民輸粟義倉吏違法倍斂昭遠力減其半四邑以羨餘米上昭遠曰此非天降非地出蓋虐取於民耳盡卻之民大感悅

明一統志

王大寶字元龜潮州人建炎初廷試第二授南雄州教授移病歸閱數年知袁州進詩書易解上謂執政曰大寶留意經術其書甚可采可與內除遂除國子司業兼崇政殿說書

宋史

郭濤紹興閒知萍鄉縣事兵後重建縣治撫恤有方民皆悅服

萍鄉縣志

張成己紹興中知袁州言江西良田多占山岡望委守令講陂塘灌溉之利詔常平司行之

據一統志補

胡安老建安人紹興三十年宰宜春政先撫字不設鉤

距民樂其政爲立祠

嘉靖林志

曾伋字彥思紹興末知袁州孝宗卽位有旨江西和糴百萬轉輸丹陽伋奏以爲不可朝廷從之袁得免和糴

伋之力也

明一統志

張栻字敬夫漢州綿竹人浚子以廕補官孝宗時知撫州復知袁州暇日召諸生告語民以事至庭者隨事開曉之具爲告條斥異端毀淫祠而崇社稷山川古聖賢

之祀官終右文殿修撰

宋史袁州府志

柯春卿三山人淳熙閒知宜春縣事吏事精明剖決不倦太守張杓雅器重之嘗遷邑庠於秀江北後倅大府

亦著能聲

嘉靖林志

祝勛三衢人治熙中知萬載縣事時學宮爲監市所據

師徒皆寓古寺勛乃規復舊趾一新之

嘉靖
林志

潘友文瀘熙聞爲萍鄉縣尉歲饑殫心振濟民德之已

而諭邑士鍾詠輩立社倉爲經久計朱子爲之記

明一
統志

許及之字深甫永嘉人瀘熙中知分宜縣奏免積負十

七萬緡後遷去猶爲縣請減月椿錢焉

安
志

曹訓字子序開封人自贛州移知袁州廉得萬載豪民

武斷狀盡繼以法總倉二司委郡和糴訓力止之曰袁

免和糴舊矣不可復病民事竟得免

嘉靖
林志

徐傳字宗說初倅大府以稱職聞遷知袁州慈祥廉介

不妄費公帑消臺下令和糴傳以前官曾倂曹訓免糴

記上之乃不復強

嘉靖
林志

莫若晦字子明秀州崇德人紹興三十年進士除知袁州承積蠹之後一意撙節盡蠲四邑宿逋數萬緡以寬民力朞月郡計稍舒乃新黌舍築城堞修浮橋百廢具舉役不告勞

據浙江通志補

趙師慮字學古紹熙閒知宜春縣事勤撫字慎催科恤貧病嘗輟俸以爲賓客之資卒於官貧無以斂

明一統志

李訖字誠之文肅公邴之孫知袁州事性明察物無遁情而行之以恕正俸外例所當得者皆不受撙節浮費得粟二十萬別儲於廩以備荒名州濟倉

袁州府志

王僎紹興人嘉泰二年以奉議郎知萬載縣事發豪民

易谷梁之惡逮赴詔獄奸猾爲之屏迹

萬載縣志

李時中字守正由軍器監丞知袁州惻惻無華慈祥廉

介秩滿除廣東提舉去之日書所得俸白之仰山神曰

外此無他取神其鑒之其刻厲如此

嘉靖林志

李觀字東之以太常博士知袁州剖決明敏賦性廉介

不可干以私後除本路提舉茶鹽

嘉靖林志

鄭自誠字信之後易名性之嘉定元年廷試第一爲著

作佐郎出守袁州政先撫字飾以儒雅時詣學宮講論

又創藥局以濟病者去之日攀轅者塞途

明一統志

滕強恕字仁伯嘉定閒由宗正少卿出守袁州以節用

愛人爲本惠政頗多秩滿除江西漕運

明一統志

王棟字子東文正公淮之子由司農少卿出守袁州政

尚簡靜而馭吏以嚴人不敢犯秩滿改知泉州

嘉靖林志

趙鉞夫初名筠夫字仲禮明州鄞縣人宗室子紹熙四

年進士嘉定間以朝議大夫知袁州待士撫民治軍戢吏一出以誠時民苦和糴箴夫言之餉司以公帑之餘代下戶輸納上嘗問廉吏於真德秀德秀以箴夫對擢直祕閣累官湖南憲使

寶慶四明志
明一統志

石範字宗卿婺州浦江人紹熙元年進士權通判袁州峒僚弄兵袁當其衝範攝州事練軍旅廣儲蓄博訪守禦之策寇不敢近轉通判泉州卒

據浦陽人物記補

潘傳字才甫四明人寶慶元年通判袁州下車攝郡事聽斷精明庭無留訟而待士尤加意焉七閱月新守視事協贊尤多人謂倅貳之賢前此無出其右者

嘉靖林志
袁

州府志

曹叔遠字器遠温州瑞安人少學於陳傅良以經世為

務登紹熙元年進士第寶慶二年以工部郎出知袁州
減秋苗斛面米七千四百餘斛浚李渠復龜目二井修
泮宮懲毆訟戢盜賊蠲關市苛細之征郡稱大治

嘉靖
林志

袁州
府志

徐瑒字文之嚴州建德人紹定三年通判袁州會歲大
歉瑒倡議發廩平糶尋署本州事益孳孳荒政全活甚
眾民深德之版曹以宜春產絹委市絹二萬瑒力爭獲
免市一考擢守建昌邦人咸惜其去

袁州
府志

葉夢鼎字鎮之台州甯海人以太學上舍試入優等授
信州軍事推官攝教事遷太學錄潛祐中知袁州轉運
司和糶米三萬斛夢鼎言袁州山多而田少朝廷免和
糶已百年自今開之百姓有無窮之怨從之民湯頤獻

田學宮妻子離散夢鼎還之毀萬載旗笏邨淫祠塞其妖井丁本生母憂免喪以直祕閣江西提舉常平兼知吉州節制悍將置社倉義倉平反李義山受贓之冤召爲國子監司業寶祐五年以集英殿修撰差知贛州六年改知隆興府

宋史

程公許字季與一字希穎敘州宣化人嘉定四年進士瀋祐閒知袁州請蠲和糴之半改命郡吏部總所綱運而厚其資免募平民民甚便之新周敦頤祠葺張栻書院聘宿儒胡安之爲諸生講說杜範薦於朝召拜宗正

少卿

宋史

方岳字巨山一字秋崖徽州祁門人紹定中調南康軍教授未赴瀋祐七年差知南康軍郡當揚瀾左蠡之衝

風濤險惡置閘以便行舟湖廣總領所綱梢據閘口邀
民錢萬始得入民船有覆溺者岳取綱梢榜之百總領
賈似道怒謂岳無禮移文令具析岳謂湖廣總領所豈
可於江東郡尋體統邪大書判數百語還其文且曰豈
不知天地閒有一方岳似道益不堪遂劾諸朝朝不直
似道因兩易之改岳知邵武軍又改饒州未上罷越七
載程元鳳當國起知袁州新其橋若城及門爲大役後
邕廣連兵出湖湘旁江西而北袁有城可恃者岳力也
除尙左郎官以忤丁大全罷歸再起知撫州未赴卒

文獻志

謹案舊志有辛炳王仲疑張杓辨雖張三傳杓傳已見
統轄炳則宋史本傳絕無袁州政績而舊志乃纂入興
學受民四字且以爲本於宋史也仲疑見宋史高宗
紀建炎三年以城降金尤不當目以名宦今並從刪

元

默爾根

原作滅里干

女直人初襲父高諾爾職領兵鎮廣東

元貞元年移戍袁州盜陀頭以眾犯境悉剿除之尋廣之南恩盜起復領兵平之還歿於袁州贈懷遠大將軍

封渤海郡侯

元史高諾爾傳

嚴仲毅字伯威至正中任袁州路經歷興舉學校若孔

子廟若尊經藏書諸閣其所創置爲多

嘉靖林志

巴爾斯沁

原作別速堅

至正中爲袁州路達魯噶齊

原作達魯花赤

壬辰九月歐晉祥兵圍城巴爾斯沁誓眾固守明年十

一月食盡城陷巴爾斯沁與同知孫嗣遠被執不屈皆

遇害知事程鵬翼自焚死同時宜春簿周子忠被執亦

死焉

嘉靖林志

托克托

原作脫脫

至正閒同知萍鄉州事剛勇果決壬辰斲

黃賊歐普祥率眾自湖南醴陵犯萍鄉至黃花渡托克

托集義兵拒戰死之

嘉靖林志

鄭時中字以道榮澤人任袁州路推官司讞詳明獄無

留滯一時以廉幹聞

袁州府志

明

隨贊山東卽壘人洪武中通判袁州州屢經兵革贊招

徠流亡課以農桑田野墾闢民刻石頌德

據一統志補

韋富湖廣黃岡人明初任袁州衛千戶升指揮僉事衛

治勦建多其績尋以擒宋赤腳功擢指揮同知

據袁州府志補

杜谷珍繁昌人洪武元年知萍鄉州事兵革後招撫流

亡立鋪舍勸耕織百姓安之未幾卒於官

安志

趙中字允中懷甯人洪武二年知萬載縣事紅巾亂後

民轉徙不遑存者不滿百戶中勞來安撫悉復其故縣

廳廟學之屬皆其所建也

嘉靖林志

趙彞洪武三年任萍鄉知縣招流亡撫孤弱其所設施

條理畢具繼任者為李順英陝西人

縣志西安人

興學造士

民頗安其化云

嘉靖林志

賈志通淮安人洪武八年知萬載縣事為政愷悌民懷

其惠時廟學未就志通捐俸率邑人新之庠士課程躬

自稽督尤為士林所感

嘉靖林志

束清丹徒人洪武二十七年以人才授萬載知縣慈愛

廉明儉以自奉民或逋租負不能償者清每代完之一

明

統志

楊任浙江嘉興人性至孝嗜學洪武中由人材起家歷

官袁州知府政多宜民致仕歸以匿黃子澄於家磔死

二子禮益俱斬親屬戍邊

據明史黃子澄傳袁州府志補

舒仲誠貴池人建文時由太學生任萬載知縣爲政嚴

明處斷平允時小民多逋逃仲誠勸富室貸以穀種農

具僦房舍使耕且居勿收其息民翕然歸之嘗朔旦謁

廟里婦有篝燈晨績者仲誠賚以米布由是相勸以勤

擢湖廣按察司僉事

嘉靖林志

周鐸山東鄆城人永樂中知袁州府事剛毅廉正興學

校革奸弊郡人悅服卒於官

明一統志

何正山東武城人永樂六年知萍鄉縣事鄰寇李法良

掠湘潭醴陵閉正導袁軍討平之又築陂灌田數千頃

民爲歌曰寇至侯禦之民饑侯食之至今猶頌焉

豫章書

萍鄉縣志

汪悠久浙江餘姚人太學生宣德初知萬載縣事法制

嚴整洞察隱微先是邑逋賦有至六七年者民逃亡過

半悠久至爲奏免之民始安業

嘉靖林志

張受才福建甯化人宣德七年由吏員任萬載縣丞清

廉勤慎先是徵科無紀吏緣爲奸受才分里設甲總以

便稽查擇地置倉以時轉運耗費悉定規則自是賦稅

均平去日單騎隻輪所藏惟書畫筆札而已民感之有

衛至其家者

萬載縣志

周瑛嘉定人太學生正統初知分宜縣事先是縣糧額

畝科米一斗六升民由是逋且困瑛疏準每畝止納本

色米五升三合餘折銀布民困始蘇

嘉靖林志

姚文字敏學浙江嘉興人正統七年知袁州府事性廉

正吏不敢欺興利除害民皆稱便卒於官囊橐蕭然

明一

統志

李璫福建福清人正統四年進士七年知萬載縣事寬

猛得宜訟以是簡每朔望詣學勵諸生寬其徭役士翕

然知學都御史韓雍以廉能薦升衡州通判

嘉靖林志

吳璠南直隸山陽人景泰五年進士七年知分宜縣事

善釐積弊門不設監鑰而請託私謁無一至稅糧折色

科派均平民投諜訟訴悉令自拘至則決以片言而去

天順中召爲監察御史

嘉靖林志

劉懋永平人舉人天順七年由南京刑部員外郎升袁

州知府清通敬慎莅事勤能重刻李泰伯學記立石郡庠門外勵諸生以有用之學秀江橋圯醵以石其上架屋連楹皆捐資以應士民德之

袁州府志

邢廷禎浙江金華人成化二年由廣州經歷擢知萬載縣明敏平恕撫恤輦獨尤摯民苦飼官馬廷禎力請於公府始得免累

袁州府志

陳瑤字仲華廣西全州人成化八年進士十六年知萬載縣事革吏弊悉民情以興學勸農爲務升監察御史

歷官至都御史

明一統志

莫立之字斯立浙江錢塘人成化十七年進士十九年知分宜縣事以仁恕稱修學築城建倉造橋皆有成績

擢監察御史

嘉靖林志

王俊字世英福建閩縣人宏治元年由戶部員外郎出爲袁州知府風采嚴整政令明肅持大體不忽輕細豪家武斷者雖有恃一繩以法吏民畏憚修學宮課生徒以學時臨稽閱士風稱振起焉升廣東參政

袁州府志

吳蘭字佩之南直隸崑山人宏治十二年進士十四年知分宜縣事慈厚廉謹嘗卻徵稅羨餘置萬石倉儲穀以備振糧長征民類加耗蘭令民自至縣廡下概之宿

弊遂革擢南京監察御史

嘉靖林志
袁州府志

張時孜字惟善一字岫雲浙江鄞縣人宏治十二年進士十七年知萍鄉縣事萍鄉故凋邑又孔道冠蓋雜遝令日策馬送迎供饋賓客不暇給時孜至一切不問日坐堂上校簿握算搜剔殘蠹窮宵旦不休裁冗費鋤豪

惡毀淫祠興學校平反冤獄布德施惠與民更始以勞

卒官

據袁州府志鄞縣志兩浙名賢錄補

梁奎廣東順德人舉人正德五年爲袁州府通判時姚源洞賊猖獗奎領兵勦捕奮勇力戰歿於鋒鏑士民哀

焉

嘉靖林志

陸璫字溫夫浙江蘭谿人舉人正德六年知萬載縣事有惠政邑多巨豪爲盜璫獮薶靡遺富戶欺官誣民者繩以法歲饑民多逋賦檄蜩集璫自繫就訴民咸願以身代璫曰父老無自苦吾甯去官不忍爾輩流離也後竟以事去民痛哭遮留至今思慕不置

袁州府志萬載縣志

徐連陝西朝邑人宏治十二年進士正德八年由戶部郎中出爲袁州知府宸濠變起連起兵會王守仁於樟

樹鎮同臨江知府戴德孺贛州知府邢珣等各將精兵破賊於黃家渡獲首功千餘事定巡江西右參政世宗

錄功增秩二等

明史伍文定傳白志

李元珪初以貢士授袁州訓導承府命往省祝甯王壽禮畢登舟而宸濠叛令他校官促之來珪不屈將死以救免卒應王守仁成討賊功

福建通志

嚴鳳字季祥浙江歸安人舉人正德十五年知分宜縣事敕政以寬民俗皆稱便會部使者至督糧急鳳請以身代繫民皆感之自奉最儉敝衣疏食而已升南昌府

同知

袁州府志

王卿山西臨縣人正德九年進士嘉靖十年知袁州府事質實有器度民有訟願自平者聽禁隸役妄勾由是

獄訟少減升浙江按察副使

袁州府志

史立模浙江餘姚人正德十六年進士嘉靖閒任袁州府同知政尚威嚴釐正夙弊豪武者不得逞蝗災出令捕之更以斛米易蝗斗蝗遂盡馬差困民立模設四季馬甲法以節勞逸著爲令升惠州知府

安志

張參南直隸華亭人舉人嘉靖閒任宜春知縣敏辨有吏才民苦糧長徵收參設局縣門立十限法民便之歲饑施振甚至升工部主事

袁州府志

陳鵠南直隸武進人嘉靖十七年進士十九年知分宜縣事周知民隱徵收令民自輸禁里長勒索入覲後庫失金累典守者鵠廉得眞盜置之法一縣肅然

據袁州府志補

劉應熊字得陽陝西隴西人嘉靖二十年進士知分宜

縣事邑人王臣大學士嚴嵩客也橫里中殺人應熊置諸法監司某亦嵩客也承風旨陷之下應熊獄後得雪以卓異薦於朝擢監察御史

陝西通志

徐杖字世寅一字鳳竹南直隸常熟人嘉靖二十六年進士二十七年知宜春縣事爲政寬恕滌除煩苛建藏書閣新啟聖祠校士則拔其雋者使居昌黎書院以勵其學三年擢御史後巡撫江西

宜春縣志

袁襲裳字子宜四川眉州人嘉靖十四年進士三十二年任袁州知府禮士愛民藹然如冬日時嚴嵩方當國襲裳不附麗之蒼頭有犯者必繩以法人尤以爲難升

嶺北副使

袁州府志

楊自治字以善四川崇慶州人嘉靖三十五年令萍鄉

勤敏廉謹歲省里甲浮費數千金革錢糧包攬之弊修學繕城置橋梁立社倉裕民儲蓄時有流賊之警自治創關營以爲保障民尤賴焉升本府同知累官雲南按察司僉事

安志

季德甫字仲修南直隸太倉人嘉靖二十三年進士三十七年任袁州知府有惠政念袁州上瘠民貧科徵偏重力申請得減勒碑儀門杜後患民感其德

袁州府志

鄭宣化字行義龍江左衛人嘉靖四十四年進士四十五年任袁州府推官材猷通敏折獄輕重適宜如訊南贛三巢之俘平豐城清江二邑之界汰豐城數千石之浮糧皆卓卓在人口者遷南京工部主事

據袁州府志補

王貽德廣西全州人嘉靖四十四年進士任分宜知縣

廉以禔躬方以事上聽訟剖決如流疏食布衣子惠甚著其後司憲西蜀袁士有官屬下者猶殷殷問鈴陽疾

苦云

據袁州府志補

劉廷舉字巨塘湖廣麻城人嘉靖二十九年進士初爲宜春令以不附權要去隆慶元年擢知袁州府廉平仁恕屬吏不飭簠簋者不少假貸郡大饑捐俸資糜以振民賴存活去官日有徹底澄清之譽

安志袁州府志

郭諫臣字子忠南直隸長洲人嘉靖四十一年進士初爲袁州府推官時嚴嵩雖以罪免其子世蕃恣橫如故諫臣乃密籍其姦逆不道事因御史林潤上之世蕃遂伏法轉吏部主事遷員外郎萬厯初數上書論時事語多切直遂出爲江西參政甫三月卽自劾歸後起撫鄖

陽未上而卒

據蘇州府志及郭鯤溟集補

徐一唯湖廣蘄水人進士隆慶五年任萬載知縣沈毅

果決置學田以贍師生定瀏陽豪戶爭地之亂擣大圍

山巨寇李大鑾等民賴以安升南京戶部主事

安志

趙口新福建晉江人隆慶五年進士六年知分宜縣事

會簿錄嚴嵩家檄日新賣其沒入之產牘籍繁錯吏思

乘以漁利日新授吏簡一覽無遺寸田尺宅莫敢隱性

峻潔徵賦無濫羨尤長折獄民有母以驟病卒或誣以

逆日新疑之一日自郡城歸過其里假寐輿中若見婦

人爲子訴甚悉亟呼究白其冤邑以爲神

袁州府志

鄭惇典字維敕福建侯官人嘉靖四十一年進士萬曆

二年任袁州知府性嚴慎律諸士以禮尤重農事舉行

溝洫之政吏民兢兢既奉其法又樂其寬仁云

袁州府志謝

志原案府志載羅輅為袁州知府均差役繕城隍置文廟樂器考正推樂校試生徒親為課督其治行與惇典相似輅已見南昌府事實不甚詳今采附於此

陳端言廣東海陽人舉人萬厯九年任袁州府推官沈靜清嚴威惠並著有訟至細心剖決吏胥不能售其奸署宜春時庫吏盜金錢事覺治之無所容假一郡肅然

據袁州府志補

黃洽中湖廣長沙人萬厯十一年進士十七年知宜春縣事歲荒悉心振救開倉借貸給貧生穀人一石令秋閒自買還倉民得無困擢刑部主事

宜春縣志

陸世勣字汝嘉南直隸邳州人舉人萬厯二十年任萍鄉知縣精明果斷愛士恤民營孔廟購遺書修禮器輯

圖經百廢具舉縣例視米編差官受其餘米世勛不然

民尤頌其廉惠

萍鄉縣志

畢懋良字師舉一字見素南直隸歙縣人萬厯二十三年進士知萬載縣事縣接壤瀏陽逋賦者多逃其境懋良蠲夙負給民牛種墾荒民稍稍集南糧解戶苦賠累懋良僉南布並解就所發布價營息以紓其力他若立社倉革火耗裁樣鹽禁差船課士修學皆以次爲之居官日食豆粥家人不能堪懋良曰若不官安所得食秩滿升禮部主事官至戶部左侍郎總督倉場

萬載縣志

王隆德浙江烏程人萬厯三十五年進士三十六年任袁州府推官有才識時撫按行部以錢糧條鞭之外復有值櫃收銀南糧民解爲里甲困及衙門供應取辦地

方之弊檄隆德與建昌推官陸鍵敷之乃議量加四差糧歸官解僉點吏書修署置物皆官爲料簡不以累民夫馬給驛假借私派有稽請著爲令一時稱便

袁州府志

黃鳴喬字啟融福建莆田人萬厯三十二年進士四十五年知袁州府事治行兼優修郡學濬李渠造珠泉亭表黃子澄祠墓百廢具興尤念袁賦浮重修郡志時備書誤報始末其後清汰浮糧卒以是書爲徵云升河南

副使

一統志
袁州府志

倫應祥廣東南海人舉人萬厯閒任萬載知縣政尙嚴明力鋤強暴峻訟者必置之法值洪水米價騰貴應祥以便宜出南米發糶禁豪強般運射利者饑民以甦

萬載

縣志

謹案萬載新志云倫應祥西甯人與舊志不同附注俟攷

姚繼舜字虞廷浙江桐鄉人舉人萬厯四十四年任萬載知縣善治刑獄有命案必詣城隍祠勘詰往往得其實先是邑無賴多服水莽詐人財或以自死繼舜遇訴者一切不問而命人覓產水莽處剗其根自是少息歲大饑繼以疾疫設振施藥皆出積俸爲之全活甚眾嘗自書其門曰鄉井有田官早種縣庭無事莫頻來其爲政可知矣

安志 萬載縣志

韋明傑字叔萬浙江烏程籍長興人崇禎元年進士二年任萬載知縣質直明決愛士恤民值增餉加派民不堪命明傑一再申請卒視他邑少減纂修邑志著有籲天四議康樂民隱諸篇後以謫去

萬載縣志

吳鼎元廣東舉人崇禎閒任袁州府推官署宜春縣事

時戶胥藉口補平私派幫解鼎元痛懲之申請禁革勒

石縣門

據袁州府志補

陳瑣福建漳浦人天啟五年進士崇禎十年爲袁州府推官拒楚賊有功後遷湖廣右參議十六年張獻忠陷長沙被執不屈死

白志

丁聖時字墨巖湖廣巴陵人崇禎元年進士十一年爲袁州府推官盡心讞決風采凜然嘗申革宜春縣私議幫費建喝斷關以遏萍鄉之衝郡人德焉

安志

曾宜高字清重順德舉人崇禎十四年任萬載知縣慈惠簡易視民如兒孫民亦以母所自育者視之稱以外公志其愛也明年將解任山寇猖獗相戒勿驚外公其感人如此至今袁士談往者於宜高猶仍昔日之稱云

據袁州府志補

陸天祚浙江人崇禎十五年任萍鄉主簿明年冬張獻忠陷萍鄉賊首張化龍執之使降天祚曰主簿降無益

於汝願請死賊怒遂遇害

萍鄉縣志

陳平策四川武進士崇禎閒任萍鄉營守備十六年冬張獻忠黨張化龍來攻破插嶺關平策力戰被執不屈

死

據袁州府志補

李時興字念劬福建福清人舉人山臨江府同知改袁州攝府事乙酉七月南昌已降時興猶城守無何守將蒲纓兵潰湖廣援將黃朝宣五營亦譟歸時興度不能守自縊於萍鄉官舍一僕亦隨死

白志

謹案舊志有范欽傳欽後官南贛巡撫有政績今改入統轄

國朝

王忻字燕皇山東章邱人順治二年知宜春縣事時軍興旁午鎮兵驕悍饋少後輒譟入署忻善諭之無譁者邑久困浮糧忻時於臺司前縷悉力請卒獲減免十年改選去官舟次新喻遇兵害

一統志宜春縣志

劉鋹字木庵直隸祁州人拔貢生順治六年爲袁州府同知時郡初復環城皆兵諸將橫索無厭械繫諸紳士眾洶洶鋹與推官王延禔力爲請不獲輒言之上官多所全釋十月攝府事益加意保釐飭貪禁暴凡強糴不與民值者繩以法兵乃稍戢

一統志袁州府志

吳興祚字留邨漢軍正紅旗人順治七年由貢生知萍鄉縣事修城池建縣治新文廟招撫流亡貸牛種以給

耕者歲荒歛捐資振濟全活無算署內汲水採薪諸役皆老僕任之絲毫無取於民又立義館以課士與諸生論文賦詩無虛日旋調山西大甯知縣累官至兩廣總

督降副都統卒

本傳 袁州府志

江載清字子厚湖北黃州人舉人順治九年任分宜知縣始至問民所疾苦輕徭薄賦禮士校文一變前令侈橫之習民俗稍定暮年以勞卒囊無餘金邑人士皆爲

流涕

袁州府志

吳南岱字泰巖江南武進人順治六年進士十年以員外郎出知袁州府時江西右布政使莊應會上計陳言請汰袁瑞浮糧下戶部議南岱適膺命未出都亟持袁郡志詣部言狀請檄撫臣確查卒汰袁州浮糧十萬石

郡方凋敝南岱力爲撫循進諸生講業凡城池學校津梁之政靡不修舉又續修袁州府志有公暇草等書行

世

一統志
安志

張浩字鶴胎江南無錫人拔貢生順治十七年知宜春縣事廉明能斷胥役憚之明季兵燹後圖籍散失田糧之數易淆浩立局清查令民呈報閱三月籍定賦稅始得其實而官無漏徵

安志
袁州府志

吳自肅字在公山東海豐人康熙三年進士十二年任萬載知縣時長沙失守大兵駐袁郡郡守檄自肅至郡佐理軍需有議開城濠者自肅以勞民動眾力止之邑兩遭寇陷民亡田蕪自肅繪圖以請前後至數萬言

萬載
縣志

馬光遠漢軍正白旗人康熙十五年任袁州府同知時
棚寇肆虐荼毒居民光遠初入境遇流移數百人悉招
徠安輯之及受任召募鄉勇諭以忠義隨官軍征剿悉
平羣寇復徧閭鄉邨搜除餘黨遇陷賊百姓力爲拯救
生全者千百餘人時官軍駐袁光遠供軍儲還俘虜賊
強兵振饑乏施惠於民甚大勸課農桑清理訟獄培養
士類優恤軍丁善政又惓惓焉以潯暑巡行遘疾卒於
官民哀號如失父母

八旗通志
袁州府志

常維楨字晉臣一字白山奉天廣甯人康熙十七年知
萬載縣事年甫弱冠明察甚吏莫能欺兵燹後民多流
亡招徠撫綏不遺餘力會檄催逋賦甚急維楨慝陳丁
缺田荒狀事得緩公暇肆力於學工詩及書修學宮設

義學茸衙署纂邑乘皆捐俸倡爲之在任七年清白如

一升行人司士民建講堂以祀

萬載縣志

蔡文鸞字桐友廣東南海人舉人康熙二十年知分宜縣事縣當兵燹之後土荒民困文鸞至竭力撫循革耗費省徭役講學勸善與民休息自奉儉約布衣疏食泊如也以勞卒官同官入視斂具見所御敝衾破幃有貧士所不堪者咸歎息民爲罷市哭奠如喪所親

分宜縣志

梁鼎字公調陝西長安人以父化鳳官提督予廕康熙

十三年改就武職二十一年任袁州副將簡閱軍士以

時訓練將卒奉令惟謹性閒雅有輕裘緩帶之風累擢

至提督改福建浙江總督

本傳袁州府志

甘國璽字儀萬漢軍正藍旗人監生康熙二十四年任

分宜知縣英年踔厲遇事有剴決才邑編戶一百八里兵後減耗積年爲里甲累國垣勾稽釐剔併爲三十六圖民始猶多方撓之旣而賦役獲平食其福者數世在

任十年卒於官

袁州府志

康共字明我一字薊門直隸薊州人康熙二十七年任袁州副將袁當兵燹之後四境蕭條共下車嚴悍卒撥民之禁違者不少恕自是兵民相安歲旱設法振貸禱祀有虔又立義學於北郊課貧士之不能就學者莅鎮八年威惠甚著士民咸愛戴之

袁州府志

江爲龍字硯崖安徽桐城人康熙三十九年進士四十四三年由中書改宜春令寬和平恕政簡刑清倡建宜陽書院捐置田三十七畝有奇助師生膏火宜春之有書

院自爲龍始尋署袁州府同知

宜春縣志

遲維璽漢軍正白旗人康熙五十七年知袁州府事端重寡言笑見者肅然敬憚然開誠布公四邑利病民皆得陳所見不敢欺亦不忍欺也袁屬胥吏舊以富室子報充郡官詣縣里民苦於科派維璽皆申請革免民困

獲蘇

袁州府志

莊令翼江蘇武進人進士康熙五十七年任宜春知縣愛民如子尤宏獎士類嘗捐俸置田二十餘畝助宜陽書院膏火考校生徒若師課弟民愛戴之祀五賢祠

宜春縣志

施昭庭字筠瞻一字寄篴浙江嘉善人康熙五十四年進士五十八年知萬載縣事精勤嚴密猾吏莫能欺下

車後卽倡修文廟禮賢士有知人鑒雍正元年臺灣逸賊溫上貴嘯聚岐源昭庭設方略立賞格招徠四境義勇指揮擒剿晝夜率吏卒巡城賊畏不敢出卒以撲滅事平逆案糾紛虛心平反不妄罪一人亦不以軍需爲

民擾踰年得疾告歸

袁州府志
萬載縣志

呂耀曾河南新安人康熙四十五年進士雍正五年知袁州府事下車卽懲衙蠹數人奸猾斂迹里民以雜派不均構訟屢不決耀曾稽牘曰此陋規也何訟爲立除採買雜辦諸科派勒石永禁焉累官倉場總督

袁州府志

劉子尹河南長葛人進士乾隆十五年知宜春縣事治獄明決訟者甫投牒於庭卽批訊具得其曲折理細者必予杖士民畏服訟日稀庚午歲饑民掘土及草根以

食子尹平羅倡捐全活者眾尋以他事被議去復任卒

於官

袁州府志

張敕字粒民江蘇上元人拔貢生乾隆二十一年知萍鄉縣善決訟日判十數事先是萍鄉營前匿一男子貌甚異詰之不答狀若甚支離者疑爲匪執以送縣考掠備至卒無詞敕至知其誣給筆札令書尙能作字則安福郁姓瘠者也營弁不之信刺以錐入三寸許竟不能出聲乃大服瘠者遂獲釋在官數年庶事畢舉註誤去

士民惜之

袁州府志

張立中貴州銅仁人舉人乾隆二十一年知萬載縣事息民養士自奉潛如值歲饑捐俸振卹夜則巡行伺察盜藪奸宄刈無遺解任後宦橐蕭然餽遺輒屏弗受曰

吾素清貧異時課徒足自給無爲爾曹憂也

袁州府志

盧崧漢軍鑲黃旗人副貢生先任蓮花廳同知有善政

乾隆三十一年權袁州府事清操自勵以振興人文爲

己任嘗倡修宜春縣學葺韓昌黎祠量給書院膏火以

勵士攝篆二載舉廢墜飭風化去後常見思後知吉安

府重修府志勤敏任事一如在袁州時

袁州府志吉安府志

徐樂山字蘭田順天宛平人舉人嘉慶十六年知宜春

縣事清操自矢嘗以事行鄉檢推隨從惟丁胥伍伯數

人民以不擾亦未聞有波累者尋任東鄉三年政聲如

在宜春時道光中復莅東鄉甫半載病篤貧不能備斂

具會縣試有以重資求首錄者幕友慫恿之樂山厲聲

曰吾子亦讀書敢以死故而誤真才乎卽藁葬無恨旣

卒不能歸遂占籍焉

宜春縣志
東鄉縣志

崔登鼈字仙洲山東壽張人舉人道光二十二年知萬

載縣事持讞平允甚得民心二十六年調知新建二十

九年補南昌府總捕同知咸豐三年署吉安知府歷任

皆有政聲值粵寇鴟張內安外禦措置井井心力尤交

瘁云尋擢山西潞安知府

萬載縣職官
志墓志銘

劉恆泰字象九山東沂水人拔貢生道光二十六年知

萬載縣事才智過人訟無留牘發奸摘伏如神豪強皆

屏息當時頗以風采過嚴爲患去後思之皆嘆服

袁州府志

萬清浙江駐防舉人咸豐五年知萍鄉縣事性慈惠愛

民如子會粵賊陷袁州遂擾萍鄉清招募練勇躬禦賊

備嘗艱苦卒挫其鋒地方賴以安靜民感其德肖像祀

之萍鄉縣志

宦績錄七臨江府

漢

周瑜字公瑾廬江舒人也建安中孫策定豫章廬陵瑜

留鎮巴邱三國吳志

謹案謝志誤載吳萬歲一人今刪去辨詳職官表

晉

羅綏耒陽人令新淦有惠政新淦人楊羨為其州將引

綏子含為主簿及羨去職含送之到縣新淦人以舊宰

之子咸致餽遺焉據臨江府志補

謹案舊志有王懿傳列宋代懿未官江西其封新淦縣侯已見封爵表舊志引南史廣固之戰與江西無涉其與盧循戰於左里則晉末事也今依安志不錄以昭覈實

隋

李子樂開皇十年爲新淦令時廢石陽巴邱二縣入新淦隸吉州子樂以縣治去州遠徙南市邨相土卜宅民到於今稱之

臨江府志

唐 南唐附

杜臻大厯間攝新淦令初縣治在龍池墅大水城圯郡守李嘉祐建議遷之臻相度形勢遂徙縣治於虎瞰山之北

明一統志

李筠天祐間令新淦會邑升都制置治所割吉水新淦

豐城三縣隸之筠興版築高其城壁邑始爲雄鎮

嘉靖林志

李著爲新淦簿攝縣事縣多火災民居故覆茅易焚熱且侵官道著諭民盡易以瓦又浚古湮井六自是火不

爲災

明一統志

宋

韓振開寶元年爲新淦制置使以新定三縣事繁時樊知古充採訪使遂申乞以所屬刑獄關覆吉州而制置

司罷

嘉靖林志

龐籍字醇之單州武城人及進士第爲殿中侍御史孔道輔謂人曰言官多觀望宰相意獨龐醇之天子御史也坐事降太常博士知臨江軍籍曉律令長於吏事治民頗有惠愛累官同中書門下平章事觀文殿大學士以太子太保致仕封潁國公卒諡莊敏

宋史

王說字巖夫開封人守臨江時郡有冤獄多所平反

臨江府志

府志

謝志原案前志載呂嘉問爲臨江守王安石以詩送之云黃雀有頭顱長行萬里餘想因君出守暫得

免苞苴又引宋史嘉問本傳辨其歷官無出守臨江語
而據安石詩以爲本傳失載云考通鑑熙寧三年呂公
弼以安石變法具疏將論之從孫嘉問竊其藁以示安
石安石先白之帝怒遂罷公弼知太原府呂氏號嘉問
爲家賊如此人卽有美政亦不當以列名宦況絕無政
績可紀邪其諂事安石自宜有詩相送何足爲重今特
去削

張好古字敏求南康人元祐閒知新淦縣事莅官勤敏

革弊舉廢眾服其廉

嘉靖
林志

林冲之字和叔興化軍莆田人元符三年進士宣和閒

知臨江軍會漕司議廣東海艦敷數諸路以守令數豐

殺爲殿最時僧多蕩產民亦告病冲之措置多方夙弊

盡革靖康初擢主客郎中介中書侍郎陳過庭使金同

被執抗節不屈而死

宋史
江府志
臨

李之邵建康人

一作建
安人

建炎初爲新喻武尉隆祐太后

幸虔州扈從後軍以糧運不至遂爲亂之邵拒之萬全里兵敗不屈大罵賊賊殺之尋賊酋壯其言誅害之邵

者

明一統志
臨江府志

張著字少微處州龍泉人崇甯二年進士紹興初知臨江軍政事嚴明吏民畏服值大旱有吉州豪歐陽建光者謀溺北客私其妻事洩移獄推鞠著廉實發摘獄決

而雨

嘉靖
林志

孔端木字子與

舊志作字
子公誤

舊名端朝兗州仙源人孔子

四十八世孫宣和四年賜上舍出身建炎中擢右司郎

中知袁州奉祠起知臨江軍一新校舍撥黃冠私田益

學糧旣去諸生祠之

宋李以申
續新安志

汪杲紹興閒知新淦縣以扶植文風爲已任新淦之士

獨盛於他邑者杲之力也

明一統志

江溥字叔源信安人乾道閒知臨江軍歲大侵溥乞糴旁郡勸富民出義粟作糜以食饑者民賴以濟邑豪鍾氏武斷鄉曲溥發其奸置於法人咸快之

臨江府志

沈說字直之吳興人淳熙閒知臨江軍嘗買民地廣書院增屋數十閒又刊春秋權衡意林諸書於郡學以惠來者官至戶部尙書

臨江府志

陳士楚字英仲淳熙閒爲臨江軍司戶時新喻稅版多僞豪右恆佚賦爲貧民累士楚督儲至邑悉釐正之吏胥莫能欺仕至起居舍人

臨江府志

何洪慶元閒知新淦縣崇尚禮教不施鞭扑而民畏服之會邑大疫洪開惠民局延良醫以治又置養濟院收

無告者民甚德焉

豫章書

王蓮字少愚濡須人慶元閒知臨江軍故事郡市黃雀
鮓歲遺朝貴率三萬計蓮至悉罷之召還之日凡邸第

供御悉籍以歸公秋毫不取仕至戶部侍郎

嘉靖
林志

趙師道字載道通判臨江軍事以試院狹隘因申郡漕

開拓之又括在官之田置貢士莊以助儲計吏者

臨江府志

丁必稱字季言蘄州人知臨江軍事江西和買例以稅

產均敷其無稅者以物力必稱因積郡帑之贏代輸物

力和買一年爲錢如干文乃請於朝乞永與蠲免後擢

潼川提點刑獄

嘉靖
林志

葉師中字子實永嘉人嘉定中臨江軍州教授嘗積廩

餼之餘數十百緡買田爲義廩凡仕進及賢裔之貧者

皆以是助之

嘉靖林志
臨江府志

王伯大字幼學福州人嘉定七年進士知臨江軍歲饑

振貸有法遷國子監丞累官資政殿學士

宋史謝志
原案府志伯

大置荒政局延士究古今振濟便宜法抄刷戶口全活
甚眾所著有救荒案振民錄時民有紅黃黑白罔甲乙
丙丁戶若非王知軍
俄殺人無數之謠

潘剛中字濟叔

臨江府志
作字齊父

臨安人知臨江軍時郡隄多

堰沙土水齧輒潰行者病之剛中出緡錢壘石畚築易

為坦途又置抵當庫以儲公費使來者繼修築焉

嘉靖
林志

府志
臨江

張磻字渭老福州人嘉定四年進士知臨江軍事鄰郡

有清江渡產紙部牒誤為清江縣下郡日鈔會紙三萬

磻申省辨之乃得報罷

嘉靖林志
傳磻由嘉定

舊志原案宋史本
進士歷官至刑部

尚書拜參知政事無知臨江軍事姑從舊志以俟再攷

黃自然字元輔建安人嘉定末爲臨江教授以理學誨諸生齋宿問辨率至夜分及遷廣西漕司猶捐俸餘助

修禮殿焉

嘉靖林志

金文剛字子潛徽州休甯人知奉新縣以撫輯流民功擢倅興國軍邑父老乞留遂因任秩滿累遷知臨江軍寇餘糴貴文剛取前令長沙時規約視土風事宜增損行之郡有振民倉積久幾廢爲節縮補增至餘七千石俄而帥漕總三司各糴於郡石五萬至十萬文剛以書諍曰歲入苗斛纔七春夏積潦請之倉臺求之巨室僅僅無轉徙糴雖國計民爲本其可撥乎總司怒譙文剛欲黥其吏文剛曰守可汰吏可黥民食不可奪諸司不

能屈遞減過半民德之牛車擔負爭先應令及以風聞

去官父老泣送踰十數舍

據宋林希逸所撰墓志銘補

陳日強吳興人知臨江軍甫下車即鋤豪惡劾令之貪

殘者刑清訟簡一郡肅然

嘉靖林志

陳容字公儲長樂人端平二年進士嘉熙開通判臨江

軍以才名受知理宗入為國子監主簿去後人常思之

臨江府志

鮑廉德祐初知臨江軍事元將巴延

原作伯顏等下九江分

兵以攻臨江或勸之去廉曰城亡與亡可避乎被執不

屈死

嘉靖林志

詳案舊志有羅開滿呂大防張遇黃幹四傳開滿官蜀之臨江非江西地辨見職官表大防無政績可紀遇已入廣信府列傳幹官績已載撫州此為重出並刪

元

李倜字士宏河東人大德間爲臨江路總管郡大水勞來循行振饑拯溺禱於神秋果大熟倜素剛介郡奸民不便之誣以事倜褫職去明年宣撫使至郡民數十百

人訟倜冤事始得白官至集賢學士卒謚章肅

嘉靖臨志

江府志謹案元史臧夢解傳稱倜素狡獪又附大臣勢以控持省憲夢解按其職罪一道澄清與林志不同豈其人能自致民譽抑史氏之有偏辭邪附注以俟論定

程相字仲和一字環谷徽州歙縣人宋咸淳間以從祖丞相元鳳郊祀恩奏補登仕郎入元累官承直郎臨江路清江縣尹清江有無田而輸糧者歲爲石萬蓋自宋靖康時權假於民以給軍刻石具存郡欲舉其數加民以爲己功相力爭不聽守怒將誣以罪會上官至白之

卒如相言盜起甯都軍需星火急相以夜繼日力取給
迄不乏而盜平廉訪司委覆邑旱皆懷金以伺相躬履
畝取不旱者罪之一私莫干小民時以逋負殺子女誣
債家縣官每以爲利相得其誣蔽狀罪之俗遂革歷升
中憲大夫浙東道宣慰副使致仕歸卒年七十七

據新安文

補志

茂巴爾

原作木八刺

字世明至正初守臨江崇儒興學愛民

如子卒於官郡人哀之聲動城邑

臨江府志

月忽難色日人元末爲臨江路經歷臨江故多虎狼之
卒民忤之者必中以奇禍獄訟興滅皆出其喜怒百姓
側足畏避號曰笳鼓謂其部黨眾而心力齊也月忽難
初至訪民瘼按宿獄凡壅滯不決者皆笳鼓之徒爲之

悉逮捕窮其奸狀餘黨斂迹退散農民入城市相謂曰
微經歷吾與若敢來此乎

豫章書

明

趙天麟東平人明初同知臨江府事陳友諒遣知院蔣
必勝來寇城陷被執不屈死之贈天水郡伯立祠肖像
於南昌有太平金鏡策八卷

臨江府志

劉真字子真洪武初知臨江府事以循良稱時承元末
兵燬真撫凋瘵輯流散百廢具舉民不知勞

明一統志

楊成四川成都人建文間以刑部郎中謫知新喻縣性
耿介剴繁治劇事無留滯仕終福建參議

明一統志

聞祿永樂初任臨江通判操守廉正莅政公勤民受其
惠尋升太原知府

明一統志

金輝休甯人永樂二年進士任臨江推官見事敏給莅

政詳明持己以廉待人以恕薦擢監察御史

明一統志

李存仁浙江黃巖人永樂閒知新喻縣事廉幹有機局
初至嘗若無知逾月閭里銖兩之奸悉知之一時豪右
摧抑殆盡境內大治尤長於判事機捷若流有兩牛相
鬪一牛死主者訟之存仁判曰二牛相鬪一死一生生
者同耕死者同烹又有慢命者拘其母不出旣而執其
妻卽出曰慢命罪小不孝罪大杖殺之其隨事當理皆

此類也

嘉靖
林志

朱得順天寶坻人永樂進士知臨江府事政尙寬平歲
滿上章乞留者數百人詔升右參政仍掌府事歷任凡

二十四載

臨江
府志

胡季本字秉誠浙江餘姚人太學生授建昌府經歷擢知清江改新淦新淦號多事喜訟季本爲之才一年縣庭清肅時出郊問民所疾苦相慰勞如家人父子卒於

官

據浙江通志補

葉淇南直隸山陽人成化進士知清江縣事政平訟理

民不忍欺擢監察御史累官戶部尙書

嘉靖林志

沈榮字元節浙江平湖人天順八年進士知臨江府事

政尙嚴明吏民畏服改知延平府擢貴州參政

嘉靖林志

江府志

王佐臨皋人舉人成化間同知臨江府事公平正大以才能著稱嘗緝練子弟遺文梓行題曰金川玉屑

嘉靖林志

臨江府志

張善昭順德人舉人宏治間由四川僉事謫臨江通判先是練子甯親黨謫臨江者八十餘人善昭上書曰子甯忠貫日月太宗謂若使子甯在朕固當用之仁宗亦謂方孝孺等忠臣夫既忠之矣何肺腑外屬尙以奸惡賜配百年不宥哉疏雖不行中外皆壯之

白志

盧翊南直隸常熟人宏治三年進士知新喻縣事廉不近名仁不隳事和平豈弟有循吏之風

嘉靖林志

陳元憲連江人正德閒通判臨江府政尙廉平能於催科中存撫字門廡清嚴關節所不能到去任十載民思之如初

嘉靖林志

項經字誠之浙江秀水人忠子成化二十三年進士由御史出知太平府移知臨江與袁瑞諸郡接壤土寇出

沒其閒前有司率玩愒慮變弗敢動經置諸豪賊於法
一郡大治逾年饑有司方請振經曰民飢甚矣必請而
振是懸口以待斃也振而勿請罪在太守於是發府庫
金建和糴法民賴以濟時監司督賦方急經不奉命監
司怒繼而歲大稔民人賦恐後爲諸郡最以忤劉瑾罷
官瑾誅起江西右參政致仕據嘉興府志補

吳宗周字良弼南直隸宣城人宋丞相潛之後少以孝
行旌於鄉舉宏治九年進士知臨江府事首重師儒明
正學郡先有三教坊以佛老並儷文廟命毀之撤其材
爲學舍以居生徒之來學者嘗延莆田陳璉講五禮圖
式數年民知禮讓郡中稱治臨江府志

戴德孺字子良浙江臨海人宏治十八年進士歷工部

員外郎監蕪湖稅再遷臨江知府宸濠反遣使收府印
德孺斬之與家人誓曰吾死守孤城脫有急若輩沈池
中吾不負國也卽日戒嚴旋與巡撫王守仁共滅宸濠
以憂去世宗以德孺馭軍最整獨增三秩爲雲南右布
政使舟次徐州覆水死後贈光祿寺卿予一子官

明史
伍文

定傳

王泰浙江慈谿人舉人正德閒爲清江知縣縣舊以里
甲值日科取無度泰至除十之七會部使者督餉急泰
曰知縣可辱吾民不可迫也建倉備饑財力不取於民
卒官無以斂知府戴德孺經理其事

嘉靖
林志

徐問字用中南直隸武進人宏治十五年進士自登州
知府調知臨江民病水潦爲修築壞隄七十二轉長蘆

鹽運使歷官南京戶部尚書致仕卒於家問清節自勵
居官四十年敝廬蕭然田不滿百畝好學不倦粹然深
造爲士類所宗隆慶初謚莊裕

明史

錢琦字公良浙江海鹽人正德三年進士由刑部郎中
出知臨江府才識甚茂事當行當罷擇所便卽任之改
作公堂民無煩苦又念新淦地廣民悍當析邑分治建
議請於朝峽江始得立縣經營建置皆出其手又奏請
輕齎三年以寬新邑不果行在官五年致仕去

臨江府志

徐顥字子醇浙江仁和人正德十六年進士知臨江府
事庶政修舉發奸摘伏如神吏民莫敢欺勢家抵禁必
置之法貴人請託輒拒之曰甯負權臣不負吾民以考
績赴京歸過其家卒

安志

朱簾字守貴浙江山陰人嘉靖五年進士知峽江縣事
時縣初闢簾以寬仁爲治逋竄皆來歸嘗奉檄採木單
騎入山民無所擾有虎晝行獵而獲語人曰此山虎耳
路虎日行道中攫人誰驅之者課士尤勤雖窮鄉亦誘
使學士至今思之

安志 臨江府志

徐宗魯字希曾南直隸華亭人嘉靖八年進士任峽江
知縣有惠政丈田滌虛稅三厯寒暑髮盡白禱旱跪烈
日中祝且泣曰天甯殃我無災百姓蝗蔽野躬自督捕
徑疏乞蠲租民賴蘇息

臨江府志

李易字仲占湖廣永興人嘉靖八年進士以戶部郎出
守臨江儉樸勤慎與人無矧媿聞善益親嘗作後堂署
體仁以見志年荒設糜救饑仍振以米城北橋圯病涉

捐俸倡修之易本無子橋成舉一子人以爲陰德之報

云官至參政

臨江府志

廖文光字士龍應天上元人舉人授清江知縣時嚴嵩執政其僕橫於縣境文光捕置之法遷廣信同知郡有商被盜幾死恍聞神言令告於廖商隨投訴竟獲盜抵

罪晉戶部員外郎

江南通志

成子學字懷道廣東海陽人嘉靖二十三年進士知峽江縣事質直廉平務以德化然見惡則焚之惟恐不盡均攤沙米豪猾初弗便之未幾皆帖息焉累遷湖西僉事申峽江民冤抑甚多民爭立碑以頌

據臨江府志補

樂舜賓浙江定海人嘉靖三十八年進士知新淦縣事海寇奄至舜賓登陴拒守創製藥弩殲其渠賊宵遁明

年大水城圯舜賓贅之以憂去

臨江府志

黃尙質字宗商水軍左衛人嘉靖舉人知峽江縣事驛有羨金歲暮輸縣尙質令存之抵來歲額派練子甯遺嗣流爲廝養尙質多方覓之復其姓立祠買田俾主其

祀

臨江府志

王圻字元翰南直隸上海人嘉靖四十四年進士除清江知縣邑田糧多欺隱歲久弊積圻素精勾股法躬歷阡陌丈量勒成圖冊吏無所容奸銳意右文置學田增號舍鑄祭器又刊繩尺論以訓士其他興革悉稱是調

知萬安縣

明史文苑傳
清江縣志

江

李樂字彥和浙江烏程籍桐鄉人隆慶二年進士知新淦縣事才氣雄異初至謁郡守聞人素驕蹇不率樂先

杖之而後以聞邑中肅然新淦賦繁重申請盡一民便輸納建便民倉捐俸市穀以備振利民之事皆次第舉行邑有盜窩某者廉實卽杖殺在任數年布袍疏食清節如一日擢給事中去後歷江西廣西參議

安志 臨江府志

嘉興府志

管大勳字世臣一字慕雲浙江鄞縣人嘉靖四十四年進士選翰林院庶吉士改禮科給事中歷刑工左右給事隆慶三年出知臨江府政尚循良好儒術以表章經籍興復古學爲己任建明經書院增號舍置學田以聚來學之士修葺郡志考據精當臨江之能以文事飾吏治者必以大勳爲首云

臨江府志 鄞縣志

郭惟賢字哲卿福建晉江人萬曆二年進士授清江知

縣邑郵舊多逋額惟賢酌定驛規申緩夏秋稅期民得
甦息俗好訟不勝輒自經雖破產不悔至是嚴令禁止

最聞擢御史

安志臨江府志

賀逢舜湖廣益陽人萬厯五年進士知峽江縣事峽江
地瘠賦重逢舜請於臺使奏減例銀千餘兩酌起運緩
急立八限以寬民力丁糧銀米悉載定冊刊定糧差條
例頒示胥吏有以耗羨入者罪之奏最入爲戶部主事

臨江府志

楊宏科字意白浙江餘姚人萬厯十四年進士任新淦
知縣時凶荒洊至宏科散財發粟極力撫循之盜流劫
諸鄉捕治首惡餘無所株蔓邑賴以安擢監察御史

臨江府志

府志

張汝霖字肅之浙江山陰人萬厯二十三年進士初授廣昌令調清江知縣時朝議方興礦稅民惶懼竄山谷閒汝霖條上利害爲民請命尋中使採買樟樹鎮藥材民復大擾亦賴汝霖撫諭乃定擢兵部主事厯官湖南

副使

臨江府志

曾陳易字東陽廣東番禺人萬厯二十六年進士任新淦知縣多善政務以簡易近民自題其堂曰易事難說嘗重新文廟請恤驛遞疲困例增餽銀均南北二米編派矢心公愼雖豪貴勢家無所規避尋升南臺御史

通志

張師繹字夢澤南直隸武進

一作無錫

人萬厯二十六年進

士知新喻縣事以簡易寬大爲治嘗奉檄督逋賦嘆曰

賦逋至十年籍不可考矣徒爲老胥奸利地何益竟不行邑有銀監稅璫至橫甚師釋爲書一法字授璫前驅璫懼遂去後仕至按察使

舊志 臨江府志

鄭朝棟字二水湖廣醴陵人舉人萬歷中官臨江府同知爲人精練明敏任甫二年奸宄屏息四視邑篆循卓著稱其清核逋賦革奸役代攝尤爲良法歲丙辰沙河隄決臺司以賢能委令督築朝棟度形勢均工役木石畚鍤之具身先調度隄成堅壯逾昔仕至貴州布政使

臨江府志

林恭章福建莆田人萬歷二十六年進士補新淦令有能聲額賦聽民自納例羨無所入貧民有欲鬻妻者振之使完聚如初邑治東火捐粟卹災者時稱慈惠之師

尋升湖東道

安志 臨江府志

李徵儀字于來南直隸廣德州人萬厯二十九年進士

初令弋陽調清江知縣解戶南兌苦重費徵儀立官解

之法盡革加派包胥諸弊嘗築鍾家園隄護田萬餘頃

又例僉馬差以蘇驛困民至今思其德焉升禮部主事

臨江府志

俞誨字忠伯福建莆田人萬厯二十九年進士知新喻

縣事廉靜慈惠民被其澤嘗閱南灘水勢背郭形勝非

宜乃鑿引秀江水抱城東下至今呼爲俞公河在任九

年擢御史去

臨江府志

朱邦禎字恬宇南直隸吳縣人萬厯三十二年進士知

新淦縣事邑素苦經催疲運邦禎議船戶代解民困以

魁又擒治巨盜數十人捕黠吏置之法修倉鑿湖民永

利賴升大理評事

臨江府志

李茂英南直隸寶應人萬曆三十八年進士初選分宜知縣再調清江愛民好士清驛遞均徭役尤留心荒政倣古常平之法實力行之又建文昌閣於學宮之左規

制壯麗自是士子多登第者歷官通政

江南通志

鄧林楠字光字三水人以明經爲新淦令性廉靜均賦平訟羨利贖鍰一無所入邑夫馬歲苦徧累林楠分眾

朋充民無以擾以資格爲臺使所抑士民皆惜其去

安志

劉拯字以仁永福人舉人爲新淦令嘗因漕蠹侵折運輓不前力請民徵官解一時便之崇禎中流寇充斥邑城卑小拯培高數尺增戍以守窺伺之隙遂絕尤銳意

文教置學田修敬一亭文昌閣勉齋祠士興於學以升

任去

臨江府志

盧兆龍字侯見廣東香山天啟二年進士任清江知縣精練明敏案無留牘時征調漸繁兆龍供應無乏而民不病樟樹鎮濱江歲患衝齧兆龍倡築石岸護蛇溪

諸水鎮人以安擢禮科給事中

臨江府志

陳以運字時可南直隸貴池人舉人令新淦邑舊多糶政南北輓運歲爲船戶冒破以運條請徵解自是官民得免於累時江楚多事臨袁諸郡騷動以運繕城濠建倉庾以受委積邑有數年之備會盤山土寇起卽率兵擒斬之焚其巢崇禎癸未闖賊大掠鄰邑以運多置閒謀修甲仗團義勇爲死守計卒全其城以膽略著稱遷

邵武同知

安志

梁士濟字遂良廣東南海人天啟五年進士授奉新令奉新有猾胥以石易帑金者封識如故獄久不具士濟至立發其奸諸猾震服調知清江會楚中用兵芻餉徵給悉以軍興法從事士濟更爲寬大之令賦乃益辦工申卹寇作分守道欲豫撤城外民居士濟持不可曰脫寇至燔之無怨矣乃自出飭精銳扼諸河上民賴以安又嘗置學田贍士請廣弟子員及科舉例士論翕然歸之擢監察御史

南昌府志
臨江府志

秦鏞字大音南直隸無錫人崇禎十年進士任清江知縣邑素衝煩歲僉富民爲馬戶多竄入胥吏中以免累轉及貧戶鏞下令以胥吏僉而給其直民困頓蘇劇盜

龔森九等嘯聚沃場牛灣諸處將爲變悉以計擒斬之
在縣數年築梅家畚建義倉釐正祀典作五勸四誠歌
教民力穡興行民大化之內升御史臨江府志
謹案舊志有夏璣傳見南安府宦績錄此爲重出今刪

國朝

潘岭字石丈湖北孝感人拔貢生任新淦知縣兵燹後
百事草創岭始建文廟增築城垣修復讀書亭及橋梁
津渡之當興者清丈荒田招來頑梗士民賴之新淦縣志
李向陽山東舉人順治三年令新喻民懷吏畏風采卓
然月占講約坐善長堂上而扑頑梗於中衢以示懲勸
時初定鼎鎮卒頗驕恣向陽白諸鎮將論以法皆惕息
不敢復肆尋以疾卒官新淦縣志

于鵬翰字六息山東文登人順治十二年進士知峽江縣事縣當閩粵之衝軍馬絡繹鵬翰捐資募夫民乃不擾力請蠲荒徭而市所乘馬給民牛種二年民歸業者

萬計

一統志

許毓仁遼東人貢士知峽江縣事時連歲兵荒山谷多嘯聚爲患有土寇號閩羅宋者擁眾千餘所在劫掠不靖毓仁下車廉其狀曰是非大創之不可乃選募丁壯千人躬自訓練閱三月分路進剿斬其渠犂其穴散其脅從積患以平

臨江府志

施維翰字及甫一字研山江南華亭人

一作上海人

順治九

年進士授臨江府推官讞決如流愛民下士以廉能著稱巡撫邵廷佐疏述其理漕革弊折獄得情能使奸頑

敘迹舉爲卓異遂內升兵部主事累官至福建總督卒

諡清惠

本傳 臨江府志

符執桓山西翼城人舉人康熙二年知新喻縣事兵後縣治毀民多流亡田蒿萊者半執桓構材飭廳事及吏舍周視荒田疏逋賦之無主者聞於大吏卒得蠲除流氓來歸業捐給牛種饑則煮粥振之民賴休息卒於官

新喻縣志

屈有信字遜公河南汝州人拔貢生康熙三年知清江縣事兵燹之後田多荒蕪府縣學廟俱燬有信多方招徠終歲墾田六十餘頃築香湖庵青龍潭金谿諸隄修兩學復諸祠祀常平倉舊儲不及百石捐穀五百石益之東鄉民居隔江歲輸秋米不便建倉使之催徵令民

自輸受訴則令民齎牒召被訴者至胥役罷勿遣又教民敦讓息爭民大感化在任十四年歲無巨獄囹圄空虛及滇逆告警震及其鄰有信肅清塘汛增設哨船奸徒往往而獲轉應芻餉日無暇時然民皆安居若不知有兵事內擢主事去民立碑以志慕思

臨江府志

胡之琳字介石浙江淳安人舉人知新淦縣事修學宮及便民倉惜陰書院復陶桓公黃勉齋祠祀輯郡邑志

卒於官

臨江府志

王廷諲山西翼城人拔貢生康熙二十一年知清江縣事謙約自持廉惠馭下清江納漕半在樟樹鎮鎮去治所遠廷諲數馳至鎮倉平其概量革徵銀火耗胥吏不能爲奸縣舊編里甲失均至累鄰甲廷諲行鄉稽戶省

并其都圖於是賦平民便今尙仍其規

清江縣志

喻成龍漢軍正藍旗人由廕生歷知縣同知康熙二十六年任臨江知府廉明仁愛風節自勵時漕米解戶多累率破產成龍令悉領於官百姓便之尤鼓舞學校以隨行經籍數千卷置尊經閣以授學者建褒忠祠所表章節義之士尤多云官至湖廣總督

一統志
八旗通志

李濤字紫瀾山東德州衛人康熙十五年進士改翰林院庶吉士二十八年由編修出知臨江府巨盜張茂生者沿江剽劫爲害濤甫至廉得其事縛至通衢立斃之餘黨悉置之法民歡聲雷動清江奸胥收民稅持權衡以機械暗移輕重濤過縣門叱吏突至其處得奸狀伏法復酌定引鹽價值除其耗及里民歲供冊籍之費不

貲者民尤便之在任九年升浙江鹽運使歷官刑部侍

郎

一統志
白志

徐斯適廣東龍川人舉人康熙三十年知清江縣事廉
惠敏決訴訟盈廷數言莫不輸服有甫投牒卽不願終
訟者時知府李濤政尙綜核莅屬嚴或過操切斯適持
大體不阿嘗有獄事上牘再上再詰斯適投篆請去職
且曰法治其太甚抑無辜以邀祿某不爲也濤始疑其
寬縱旣察其平允言於上官稱其有執他邑疑獄輒命
治之多所平反縣舊以里長催賦奏銷冊籍科費甚繁
斯適至悉陳其弊於府永革除之莅縣十年禮士愛民
興利去弊至今稱有才有守必首徐公云

臨江府志

石杰字虹邨浙江嘉興

題名碑
作桐鄉

人康熙五十四年進士

五十八年任清江知縣故事徵賦以戶爲定縣賦籍惟載總戶吏因緣爲奸杰至令民自呈丁糧若干分戶注籍詳其應納之數給由滾催輸欠瞭然在目由是包納

洒重諸弊悉除民永以爲便歷官至按察使

臨江府志

李瓊瑤字上輝福建連城人乾隆十年知峽江縣事甫莅任巡視城堞半就傾圯曰不及時修築後將煩大工矣卽補繕之徵粟於民令自執概吏無所留難邑漕倉在省會者地湫隘歲運不能容船戶苦於羈守瓊瑤捐俸拓地漕運稱便

峽江縣志

彭之錦貴州安化人舉人乾隆十四年知清江縣事居官廉潔自持恆布袍蔬食勤聽斷訟至或不待訴卽已判其曲直牘無留勘事行鄉自攜錢分給從者不以擾

民民亦感其惠爭納賦稅不煩胥役焉縣祇候舊數百人謂之幫差之錦留正役汰白役且論之曰若曹宜務本業在此徒蠹吾民吾既無所用汝汝且凍餒盍去而謀生乎莅縣未一載遽以憂去民惘然若有所失云

臨江

府志

李昌昱字復旦一字匯川浙江鄞縣人乾隆十九年進士三十二年由工部郎中出知臨江府下車首廉得大猾何仰思廖永昌等治如法每謂屬邑令曰吾居鄉知此輩橫久矣諸君恃爲爪牙然使諸君播惡於眾者皆此輩也由是吏惴惴不敢肆新淦縣有沙湖苦水患瀕湖之民失耕者已數十年昌昱爲節縮公費且捐資爲屬吏倡於是築隄數百丈民業得安屬邑有殺人取貨

者牧牛兒從草閒見之邑令方舉卓異匿不報昌昱廉知之捕殺人者至一訊而服大吏密諭使寢其事不可改命他郡令會鞠乃斃殺人者於獄而以失入劾昌昱罷官

鄞縣志

李大謨字定園直隸玉田人舉人嘉慶十二年自石城縣調知清江約己愛民禮士類惟恐不及然性嚴正不能干以私十七年擢吳城同知先是清江縣蕭家隄頻歲衝決隄旁田盡爲沙淤賦無所出有司前後請豁俱以事關課程難之及大謨任吳城奉檄履勘始建議豁免大府初以爲疑繼而命瑞州守覆勘卒加大謨議得除銀百兩有奇

臨江府志

董澗字文濤一字小韭浙江鄞縣人嘉慶十四年進士

署新淦知縣縣多盜瀾密訪其首置之法四境帖然課
諸生金川書院朞年經指畫者舉業皆有法度縣士不
登薦三十餘年至十八年大比中者四人後遂相繼不
絕補餘干縣前令積虧帑金至五萬多被羈者瀾罄家
資爲償之清苦刻勵絲毫不以取於民東山書院朱子
注離騷地也絃誦久輟瀾延師課其士給以膏火立碑
記之旋以憂去民攀號不忍舍

鄞縣志

朱淶字意園浙江山陰人嘉慶四年進士改翰林院庶
吉士散館授工部主事由員外郎出知臨江府多惠政
尤以作育人才爲務倡建章山書院崇尙經術一時淹
雅之士多出其門云

臨江府志

蕭瑄字玉初貴州安化人舉人道光八年權峽江縣事

慈惠愛民折獄不輕予笞扑婉諭之發其天良民皆感泣悔悟去邑地丁銀向以錢納銀昂則錢必增琯莅任銀價適昂而收錢仍循其舊民受惠頗厚去官日竟不

名一錢

峽江縣志